

香樹齋文集續鈔

PL
2705
J378A16
1750
v.8



香樹齋文集續鈔目錄

卷一

謝

賜御製詩摺子

謝

恩旨蠲免廣額摺子

謝

諭祭先祠摺子

謝

特恩加太子太傅並賜幼子汝器

舉人摺子

謝

賜御臨顏真卿自書告劄子

奏書

御製紀恩堂記後跋

謝

御賜題且母聖冊並

賜御製

香樹齋文集續鈔目錄

卷一

謝 賜御製詩摺子

謝 恩旨蠲免廣額摺子

謝 諭祭先祠摺子

謝 特恩加太子太傅並賜幼子汝器

舉人摺子

謝 賜御臨顏真卿自書告劄子

恭書 御製紀恩堂記後跋

謝 御賜題 臣母畫冊並 賜御跋



劄子

恭跋

御製雪浪石記後

恭跋

御製玉璞抵鵲說後

孟亭馮侍御箋註玉谿生集序

光祿大夫

經筵講官文淵閣大學士兼

吏部尙書議政大臣

特贈內大臣

賜祀江南河臣合祠謚文定高公墓誌銘

宮怡雲方伯暨元配李夫人合葬墓誌銘

繼室俞夫人行狀

跋同年王樓山中丞筮屐圖幀首

浙江在籍紳耆士庶

臣

錢陳羣等恭謝

恩免七省漕米疏

恩免七省漕米恭紀

御製唐貫休畫十八羅漢像讚恭跋

教授王君傳

卷二

重脩嘉興縣學宮碑記

吳蟻園中丞七十壽序

孫母王太夫人六十壽序

叙欽支山遺印

讀墨一隅序

募脩文昌橋引

福壽字說

卦股圖說

汪季握字說

張母朱太恭人傳

式溪汪君傳

節孝吳孺人傳

鹽運副使蓼塘席君墓表

文學費雨坪墓誌銘

處州太守敬亭倉君墓誌銘

考城縣綱堂張君墓誌銘

祭馮勗齋別駕文

題臨本海岳天馬賦後

與高安徐明經

楊竹坡續刊竹雲題跋序

跋自書蘇文忠表忠觀碑後

跋唐俊公權使自相吟卷子後

跋自書與劉諸城倡和詩冊後

汪恬齋詩序

節孝張母王太孺人傳

卷三

御製幸避暑山莊詩跋

恭和 御製幸避暑山莊詩跋尾

御製鬪鹿賦恭跋

恭錄 御製生春詩二十首後跋

恭 進春帖子詞跋

御製嚴光論恭跋

恭和 御製巡幸天津詩跋

恭跋 御製題耕作蠶織二圖卽用程

槩書樓璫詩韻

恭進辛卯春帖子詞跋

御製小春說恭跋

御製學詩堂記恭跋

御製抑齋記恭跋

御製乾清宮五屏風銘恭跋

恒上人詩序

贈太子太師大宗伯沈文愨公神道碑

祭沈固廬親家文

與劉繩菴相公

與崔制軍

與王白齋司農

與馮柯堂中丞

與嵇河帥

與閔方伯

汪椒谷詩序

御題九峯園記

遵 旨覆奏劄子

諭豫章孫

敬書

御製東巡詩冊子後跋

恭和

御製東巡詩後跋

跋自書

恩賜御臨米帖恭記詩後

卷四

金櫓門總憲詩存序

武進相公繩菴內外集序

長洲程孝廉稻香樓詩序

大司馬芝庭彭公詩文集序

胡紫弦少宗伯葆璞堂詩文集序

將軍薩寄廬樗亭詩續集序

丹徒令徐卿石詩序

卜周望藕村詩草序

跋席氏安定宗賢圖像冊子後

明經沈君建偉傳畧

趙文敏書金剛經石刻題後

誥贈朝議大夫原任刑部陝西司員外郎

魚亭汪君傳畧

胡少宗伯韻玉函書序

華亭王硯亭先生七十壽序

第五叔父八袞壽序

王母鄧太夫人八十壽序

誥封恭人汪母陸太恭人七十壽序

顧孝廉月滿樓詩文集序

復胡雲坡臬使書

與沈景崔茂才書

卷五

恭跋 御製重脩文廟碑記

恭跋 御製龍馬歌

恭跋 御製聞浙省今年蠶繅甚盛喜

而有作絕句詩後

恭謝 恩免各省應征錢糧奏摺

恭跋

御製生夏詩二十首仍用元微

之韻

恭跋

御製題鄒一桂花卉山水小冊

各二十四種

恭跋

御製熱河各體詩冊子

恭跋

御製土爾扈特全部歸順記

恭跋

御製詠金剛七律十六首

恭謝

恩賜人參奏摺

恭謝

恩賜紫禁城騎馬奏摺

恭跋

欽定重刊淳化閣帖

恭跋

御製幸避暑山莊各體詩

恭跋

御製幸避暑山莊各體詩冊子

恭謝

恩賜欽定重刊淳化閣法帖奏

摺

恭跋

御製詩三集

恭跋

御製幸盤山各體詩

恭跋

御製春巡津水各體詩

恭和

御製春巡津水各體詩跋後

恭謝

恩賜御製詩三集摺

恭謝

恩准第七子汝器在四庫全書

處校錄奏摺

誥授通議大夫晉贈資政大夫禮部左侍

郎胡公神道碑

何氏再捨田拓墓并捐各房僧香火碑記

餘姚張氏禮輿山莊記

遺摺

香樹齋文集續鈔卷一

嘉興錢陳羣集齋

謝

賜御製詩摺子

奏爲恭謝

天恩事本年二月二十三日

臣同臣

沈德潛於常

州艤舟亭邊恭迎

聖駕隨蒙

恩賜沈德潛錢陳羣來接因成是什並書以賜陳羣一首又閏二月初七日蒙

恩賜錢陳羣一首跪領後卽恭和

元韻以進伏念

臣

與沈德潛均屬菰蘆下士遭際

昇平受

聖主豢養教誨一以引年歸里一以示疾林栖復
荷矜憐頻叨異數鴛湖鯉水並茂增榮年時

賜杖言旋鄉里咸推九老今茲聯橈跪接

天題褒以二仙稽古之榮於斯爲盛至

臣

柳蒲弱

質犬馬餘年感再造之

洪慈言詞莫罄拜延齡之

至意屬望尤深

召對蘭舟體恤實同於家人父子

命賡

天藻榮寵更婉於喜起遊歌冀長沐夫

恩光益加珍攝思仰酬夫

主眷倍切脩持此

臣

父子所日夜悚惕勸勉者也

合將感激下悃具摺陳謝謹奏

謝

恩旨蠲免廣額摺子

奏爲恭謝

天恩事伏惟

時巡開盛治觀民益荷仁民

錫類溥深慈造士特隆選士

天行以健南邦四仰

堯雲

皇澤如春浙水疊霑

舜露懽騰蔀屋正供常賦之胥蠲喜溢膠庠拔萃

採芹之更廣

溫綸屢加而無已

盛典廣大而難名從此原田每每盡濡霑霽之

恩膏俎豆莘莘咸入

洪鈞之陶鑄吳山越水詠太平者負耒而橫經海晏河清慶安瀾者含哺而鼓腹矣謹奏

謝

諭祭先祠摺子

奏爲恭謝

天恩事

臣

等始祖

臣

錢鏐在唐末有平賊勲勞又

有捍禦江海之績宋仁宗朝建立表忠觀於西湖之南我

皇上三舉巡典遣官祭祀復荷

駕臨親視賜詩及匾聯示褒凡屬先臣子孫人人感激今乙酉之春四舉巡典閏二月初六日遣閣學臣張若澄焚帛告祭在先臣幸際昇平仰蒙

聖主褒勲飭往益加歆格默佑効靈以資捍禦臣
等爲先臣孫子者尤思銘勒報効庶得永承祀典
勿替家風所有感激下悃理合繕摺恭謝
天恩謹奏

謝

特恩加太子太傅並賜幼子汝器舉人摺子

奏爲恭謝

天恩事本年閏二月十二日奉

上諭沈德潛錢陳羣江浙耆宿也並以卿貳予告
里居曩者省方東南存問所及特晉尙書階優頒
廩祿茲時巡莅至二臣咸扶杖迎謁耄耄而神明
不衰惟國之瑞朕甚嘉焉其各加太子太傅以寵
異之沈德潛之孫錢陳羣之幼子各一人並賜舉
人一體應禮部試二臣益忻愉恬養以躋期頤副

朕優高年眷舊臣之意欽此竊臣自林栖以來十有餘年叨沐

聖恩念臣供職卿貳行走

內廷尙屬勤慎

命在家食俸以示優眷二十六年十一月祝

釐來京又蒙

特恩加刑部尙書自慚衰質負荷未能茲恭遇

皇上四舉巡典臣與尙書沈德潛聯楫來迎得於

蘭陵水次仰觀

天顏當蒙

溫諭霽慰隨扈從到浙

聖慈稠疊

特加

臣

太子太傅伏思官銜峻秩國家褒寵耆碩

至爲榮幸

臣

何人斯膺茲異數又

臣

幼子監生

臣

錢汝器年甫十五知識蠢愚

聖主憐

臣

年耄訓迪之法漸不如前

恩賜舉人以堅其讀書之志俾小子有造以娛

臣

晚景凡茲委曲矜全之至意非

臣

思慮所能冀幸

者

高厚深恩舉家頂戴

臣

惟有切實訓誨諸子各自

樹立以期仰報

鴻慈於萬一爲此具摺恭謝

天恩謹奏

謝

賜御臨顏真卿自書告劄子

奏爲恭謝

天恩事本年閏二月初七日蒙

恩特賞

御臨顏真卿自書告一卷伏見

皇上幾餘游藝翰墨怡情於前代名人書法上自
鍾王顏柳下至蔡蘇黃米摹仿之下莫不神似所
謂挹其精華遺其糟粕者矣世傳顏真卿自書告
身爲平原書中傑出者

皇上珍之寶笈壽之貞珉茲

御臨一卷萃八法之能齊萬毫之力端莊峻潔剛
健舒和熊光早冠於西清鳳翥騰輝於南國臣何
人斯膺茲異數溯屏書於唐室但予傳觀記筆法
於宋家僅圖飛白臣今

恩遇自古罕聞奉撫楷以終身鎮同拱壁永子孫
以世守共仰

奎章

臣

曷勝感激榮幸之至謹奏

恭書

御製紀

恩堂記後跋

臣陳羣謹案天生民而立之君依古以來積德累仁受

天之祐未有如我

朝之盛者粵自

太祖肇基

太宗應

天順人用集大命

世祖冲齡踐位誕受

帝祉

聖祖聰明睿知文武聖神集守創之大成垂寧謐
於奕禩以保泰爲操存以貽謀爲重大

庭訓旣豫於平時付畀復神於簡在

世宗憲皇帝建極綏猷因心作則誕我

皇上徇齊敦敏德本生安幼日侍

憲皇帝於潛邸鑒

上器宇默契於心乃於承

歡燕喜之際特奏

御名卽蒙

召見

眷顧特優遂有隨侍熱河之

命讀書於萬壑松風自夏而秋而冬

親承

提命聰聽不忘蓋育愛之殷付托之重

大聖人先天而天弗違隱然有與

帝謂默相呼吸者詩書所稱若合符節惟我

皇上能以

天地之心爲心以

祖

宗之志爲志

臨御三十年來仔肩擔荷業業兢兢問夜求明不
遑暇食用能治臻上理化協休和綱舉而目張小
廉而大法凡夫行政用人型方訓俗事必求其萬
全道必衷諸至當而愛民保赤之意尤
聖心宵旰所厯懷况夫

文德旣昭

武功丕煥闢宇宙未闢之地臣今古未臣之人琛
賁麇來版圖式廓所以仰答

聖祖仁皇帝之恩者在是所以酬

世宗憲皇帝之恩者亦在是而

聖德冲抑鄭重有待必至於今而始有紀

恩堂記之鉅製所謂謙而彌光者乎

臣

陳羣盥手

莊誦數四仰見我

皇上溯受

知之福地闡繼述之淵衷與

御製創業守成說理歸一致義可叅觀然則

重闡奉侍之日卽爲

帝心薦祐之時

列祖

列宗實式憑之以有此今日

紀

恩之盛事也豈非天哉豈非天哉

臣

錢陳羣謹拜

手稽首恭識

謝

御賜題

臣

母畫冊並

賜御跋劄子

奏爲恭謝

天恩事本年九月十二日

臣

齎招家人從熱河行

宮歸捧到

恩賞內有

御題

臣

父母詩畫冊詩十首跋一道

臣

叩頭祇領

訖伏念

臣

母陳書素習繪事

臣

年來陸續恭進仰

邀

聖主賞鑒名載石渠實爲榮幸昨所進畫冊係

臣

母中年筆墨時

臣

父尙在隨畫隨題借歌咏以寫

昇平韻事藉呈

睿覽冀

臣

父母寒牕辛苦不致湮沒此

臣

烏鳥之

私情實亦顯揚之本志乃荷蒙

皇上洞燭下忱曲加體恤按圖指示振

天筆以揚華卽景披吟煦春暉以沛澤

特頒殊典仍

予家藏復勅專門另摹筆法還來真蹟倍增

奎壁之光榮畱弄

乙觀仍並琳瑯而什襲實藝林之盛事爲亘古之
罕逢拜此奇珍永寶生生世世被茲異數感貽子
子孫孫所有微臣感激下悃理合繕摺恭謝

天恩謹奏

原文感深鐫腎銘心
貽子子孫孫又

硃批賜改感
批云常言而得奇

對成此佳文不亦可乎
天語優獎益增感悚

恭跋

御製雪浪石記後

臣惟石之在人間其受形奇偉者未有不轉移遷徙不翼而翔者也至其傳不傳則又視其人焉李德裕牛僧孺皆好聚石而傳世者絕少白居易米芾僧維則亦有是癖其人較牛李稍勝世猶有稱之者惟蘇軾一生忠直去今六七百年幸遇我皇上重其人品賞其詩文卽其平生所愛石亦流連往復形於歌詠繪於圖畫茲恭讀

御製雪浪石記持論和平引據詳晰分見各路異

形同名而仰邀

睿賞則一也語云人重官非官重人臣又曰石以
人重非人以石重也

恭跋

御製玉璞抵鵲說後

臣惟千聞不如一見玉璞抵鵲之論本於桓寬寬實未曾親見卽晉天福中張匡鄴高居誨入于闐著西行記亦未之載後之文人學子取以命題作賦吟詩皆就風影之談意爲渲染終未究其所以自西師大捷以還疏勒諸部俱入版圖和闐新附者備列羽林始于閑語間訪其國俗

上於幾餘采其土著所云以爲說不特證寬論之非誣亦以砭耳食者之訛也夫同一鵲也在和闐

爲戾在中國爲喜地實使之然也

聖天子德化所被普天率土上下鳥獸草木咸若
夫安知和闐之鵲不數年而竟成瑞鵲乎又俟他
日和闐更番入侍者之緒論及之矣

孟亭馮侍御箋註玉谿生集序

余於乾隆初持服里居同學伯陽馮翁以司寇
予告在籍邸第與余居近朝夕過從時令孫孟亭
侍御未弱冠每侍坐間出所爲詩示余余喜而歎
曰玉谿生再生矣司寇心然余言乃辭謝曰初學
從玉谿入手庶不染油滑脂膩之習今承長者言
當不令改趨也又十年孟亭成進士爲名翰林擢
侍御史臺館中評隲孟亭詩者亦與余言券合壬
申夏余忽邁沉疴急請假歸丁丑冬孟亭以母憂
還里去余所居更近考業論文修乃祖洎余故事

獨念余衰白僅存情誼益篤旣孟亭服闋以舊有
心疾時發時止未得赴補因素愛玉谿詩文惜諸
家所註各有躋駁附會舊新唐書本傳各有岐誤
爰細意鈎核發詩文之含蘊以詳譜其行年年譜
定而詩之前後各得其所矣詩得其所文之前後
亦莫不按部就班而本傳之同異自見於是作者
之心跡大彰灼於卷帙間書成以余忝先友之末
問序於余余惟昔賢聲詩踪跡其顯晦遲早若默
有定數者然同一玉谿生集也余亦稍涉焉其膾
炙人口詩篇未嘗不流連而諷詠之餘有闕疑者

往往弗深考曩者尙書高文良公善詩愛少陵玉谿兩家多所箋記頗有得解處每奉

旨來朝退食之餘余偶詣之談論至夜分不倦曾出以相示惜未成書今得孟亭箋本與二三學子首尾繙閱浹旬始得終讀挹其聲光若更異於昔日者余亦不能自解焉是可爲玉谿幸而又多孟亭之深嗜孤詣爲難能也

香樹齋文集續金

卷一

其

光祿大夫 經筵講官文淵閣大學士兼東

部尚書議政大臣 特贈內大臣 賜

祀江南河臣合祠謚文定高公墓誌銘

公諱斌字右文號東軒元隸內府佐領

今上特恩賜隸鑲黃旗滿洲直隸兵備道累贈光

祿大夫諱登庸公大父也內府郎中兼參領佐領

累贈光祿大夫諱衍中公考也母李太夫人

誥封一品夫人公兄弟三人公居次伯兄三弟俱

官至總鎮所至各樹威德拊循將士兵民安輯皆

先公卒公生而端凝厚重至性孝友長而好學讀

書於經史外博通先儒諸集一切稗官野史不接
於目雍正四年由內府曹郎出督蘇州織造旋授
廣東布政使未赴任因太夫人年高奉

命調浙江就近迎養歷江蘇河南布政使河東副
總河巡視兩淮鹽政兼攝江寧織造江南河道總
督直隸總督吏部尚書議政大臣軍機大臣總管
內務府大臣協辦大學士充 經筵講官

玉牒館副總裁拜文淵閣大學士再出爲江南河
道總督乾隆二十年乙亥三月初九日以疾卒奉
旨贈內大臣公生於康熙三十二年五月初四日

壽七十有三乾隆二十二年

特詔祀公於江南河臣合祠二十三年

賜諡文定元配陳夫人繼配祁夫人馬夫人俱

誥封一品夫人子恒巡視兩淮鹽政女四孫男四

孫女六先是乾隆十一年丙寅

恩賜公兆於

三陵東南隅之中峪乾隆二十年九月十五日恒

奉公與三夫人以壬山丙向兼乙亥三分合葬焉

公子恒請予銘其藏憶予於乾隆三年秋先慈服

闋還京舟過清江浦公時督理南河適黃水漫溢

舟不得渡目睹公於洪濤駭浪中乘小舟與波上下每日親自督率員弁相度水勢巡視隄岸夜就宿河干行帳者已四十餘晝夜矣公之勤於民事不辭勞瘁視此予泊舟處逼近公行帳公過予舟予亦就公行帳公曰此異漲也賴

皇上鴻福無大害水勢漸平三日後風潮信過君可渡河而北矣與公相聚河干凡三日夜不成寐衣不解帶剪燭深談於論文析理議論風旨間得公底蘊殊悉後予再視學畿輔公總制直隸共事將一載公餘叩公防河之法公曰黃流宜合不宜

分固金隄明疏引要也問治清水公曰可畜不可洩加培石堰節宣啓閉庶無大悞耳至於費心力善相度則非口舌所能盡矣與潘印川但可補偏揀弊無一勞永逸之語昭合自後每歲晏入

覲復同直 內廷辛未公再任河帥

上初舉南巡盛典予忝扈從與公同閱

召試卷公平日不喜談詩賦及評權試卷商定進呈數卷公復就中舉二三卷曰是有清華之氣他日當有聲詞苑不數年皆如公言公之鑒別類此公子恒稔子辱知公深諄復以請自不得以衰老

無文辭夫誌以攷行銘以傳世公詩文政蹟爲世稱述者方垂之永久予惟撫拾其梗概爲公誌且銘曰

猗歟高公醇儒氣象德惟自修道在充養眞積力久渾然天成喜怒不色寵辱不驚事

上惟忠執事惟敬敷歷中外治靜而正詞不尚縻德亦有言程朱津筏洙泗淵源遵不中廢守益邃密老而逾堅終始如一具此衆善福乃錫之哀榮備至明禋于祠旣顯及身復昌厥後國典旌賢子孫永受有崇者峪拜

賜自

天吳越老友來銘公阡

有極身續金

卷一

三

宮怡雲方伯暨元配李夫人合葬墓誌銘

歲丙子余訪雅雨盧使君於邗江始識滇南方伯
官君怡雲方伯雅雨鄉人也時方伯次子去客官
我浙迎二親就養後去客以卓薦遷漢嘉太守方
伯老蜀道遠且險不能赴子任僑居檣李時與余
往還余聽事前植海棠一株春暮花盛放君過而
愛之日後歲逢花時風日恬暖君輒命子去矜侍
杖屨過余席花下命觴賦詩談讌極歡而罷蓋余
與君相識晚而十年來寓公地主互酌倡過從情
味甚厚乙酉仲冬君病卒於僑居正寢余年長於

君哀亦甚力疾赴哭且唁二子他日二子及余門
稽顙請銘君墓不敢辭按狀君諱爾勸字九敘晚
自號怡雲先世自鳳陽徙居萊州之高密縣高曾
以上代有隱德聞人祖廩膳生諱

父諱

順治戊戌兵部進士歷官南昌銅鼓兩衛守府祖
父以君貴皆贈如其官君少而奇穎二十補博士
弟子二十四舉於鄉以縣令起家歷郡守擢監司
晉方伯伯始終服官滇南所至著有聲績君下車恩
樂時縣舊隸土司君爲第一流官興利剔弊綱舉
目張善政不能悉舉其最大釐定錢糧較初辦善

後章程者減十之五六力請于上官得行去之日
邑人爲立生祠以祝繼同知開化日烏蠻梗化
主師討賊君獨力辦軍糈事叢集如蝟毛敏手擘
畫了了無滯屏屨糗糒芻茭百所需咄嗟立應文
武大吏交相倚重事竣議敘一等軍功旋知開化
府事普思元新諸大案君悉心鞫問開釋矣刁兩
家無辜被誣陷者百餘口又營弁緝賊不獲俘良
民八九十人以獻將定爰書君廉得其情申雪誣
枉逮繫之衆賴以全活在監司任十四年請奏免
無着之墾本水冲沙壓苦累之錢糧賑荒以銀易

米俾自爲通融災民便之後遇賑舉以爲例丁卯入

覲昇任屏藩又兼攝臬司出納會計刃虛絲理苞苴不入吏治澄清而于徐卿一案愼恤加嚴肉之白骨又神明長孫常平之法調劑損益至今迤東西猶頌德勿衰于定國決獄多陰功杜元凱度支稱武庫足以方之君生平遇事不矯厲以爲能不選輒以至僨勾稽賦稅平反獄訟精敏廉幹物無有遁情者而于端風俗正人心崇學校講農桑尤汲汲爲先務仕宦三十餘年家無長物喜讀書無

他嗜好著有南溟集行世每風雨過從惟見端坐
手一編訓子孫以忠孝敦厚易簣前數日子視疾
于牀第間君自知不起猶執予手論詩澹定自若
其古成德君子乎夫人李氏奉姑相夫訓子不愧
名家女先君五月卒子二去矜去客俱賢而有文
曉習吏事能繼君志孫四人曾孫一人將于某
年某月某日扶柩歸里合葬于某

銘曰

猗猗孤桐產彼嶧陽材中琴瑟貢于明堂器成才
瞻遠牧蠻方作屏萬里流澤孔長晚歲解組教忠

子舍不倦于勤分陰是藉與古爲徒執德愈下七
十八年修已隨化寓公生平心迹瀟灑雲馬風旗
歸依東海用妥雙棺亘千百載子孫繩繩松柏鬣

鬣

繼室俞夫人行狀

夫人姓俞氏先世籍隸浙之山陰以耕讀世守夫
人祖天行公官至福建副將以老乞休居天津稍
業鰾務慷慨好施不事居積天行公長子諱爾望
字肅瞻少敏悟好讀書不事舉子業工詩析津爲
畿南水陸都會四方羣屐駢集於此者擘箋分韻
投贈無虛日時秋谷趙先生西溟姜先生慕公雅
度稱忘年友夫人其長女也生而靜默寡言笑八
九歲時先後居祖父母喪如成人姑姊間共處端
坐或移時亘日無惰容夫人外王父金翁年七十

餘有人倫之鑑內外諸孫女歲時環聚三十餘人指夫人謂肅瞻公曰此兒適人遲他日起居當列首行也若早結褵則不驗矣戚黨中慕其德性求庚帖卜之輒不吉以是待字至二十七歲康熙甲午予舉于京兆不數月遭元配俞夫人之戚婦翁檀溪先生肅瞻公無服昆弟也以愛女脆促悲悼不能止寄書於肅瞻公曰吾老年喪女聞姪女賢可爲錢郎續膠何如肅瞻公謀於夫人金太夫人金太夫人因記父金翁言卽具以告金翁曰善子適下第以需次留京遂締姻焉予耄耋名場蕭然

行李外母金太夫人無責備意擇日延至其家就
婚甥館三日後夫人卽掃除一室設元配夫人小
像曰吾姊惜年不永設此可朝夕如在耳歲時必
潔治一二簋手捧以祀兩高堂在浙晨夕思念促
予歸省出嫁衣之鮮者奉姑及吾妹以未得同歸
侍奉爲憾肅瞻公家故多藏書夫人請於父乞列
數架於內閨予埋頭讀書置燈帳中夜分不寢夫
人理鍼箱作伴雖侵晨無倦容戊戌予再下第發
榜後歸津水客舍夫人勸慰備至猝遭先府君
凶問予亟呼搶南下客貧不得挈眷奔歸夫人痛

絕者再四予銜恤里居營先府君葬事庚子冬服將闕治裝北上道經津水見夫人延師課子兩載中門戶井井卽促予入都明年辛丑成進士館選夫人以兩子痘殤悲痛抱病幾致不起聞先太夫人將來京就養扶病先入都時予弟婦任寡居率孤姪汝鼎侍姑同留子舍夫人奉侍太夫人無不先意承志視姑姪如子壬寅春子汝誠生太夫人喜甚謂夫人曰吾年垂耳順尙未得孫用是日夜憂懼昨渡黃河默禱於河神是夕艤舟河干夢神遣朱衣使者抱一子授予曰付汝善視之

他日當亢汝宗也今子婦得孫此其徵乎旣而抱汝誠曰是子秀厚可冀成立也時太夫人以予京寓乏人爲置妾沈氏攜至京寓夫人待之如妹時四弟界年三十未娶夫人察太夫人有憂色棄簪珥等物以欣始得歸娶太夫人在京寓數年思南還予請假送歸夫人奉侍舟行遇風水稍阻體察色笑得太夫人歡心先是太夫人北上時見予同祖昆弟貧無居卽以南樓老屋數椽分假之及歸三十口無栖止所賃屋以居夫人安之若素適汝誠及女汝慎出痘俱安好夫人請予

諏吉令汝誠出就外傳時從孫載授孤姪汝鼎及
汝誠課課餘 太夫人卽授載繪事奉姑供師督
子皆夫人一身兼之無少缺予假滿還朝 太夫
人以鰥官難於奉職遣夫人及子女輩北上居無
何予奉差典楚南試事又明年奉 使關中宣諭
化導瀕行夫人謂予曰秦中連年以西師深入禦
邊戎馬織絡治行當速出嫁時物賤鬻之得值二
百金貯行篋中曰緩急當需此耳歲餘
召歸篋中存所貯之半夫人喜動顏色曰自西指
後有人來言使人所過之處父老感頌

聖德歡欣鼓舞又聞學官子弟執經問難者屏牆
行解悉開導之俾虛往實歸今者行橐蕭然使職
克稱可謂上不負

君親下不負妻子矣時

上有旨褒嘉以贊善超擢庶子越五日授學士

命充日講官起居注數年中沈安人舉二子汝恭
汝慤尋以虛症不起夫人哭之甚哀撫其子女畜
育周至曰憐其失母也又以四弟艱於舉子爲予
置妾黃氏曹氏亦體太夫人意也越年餘妾黃
氏遂舉子汝隨雍正十二年冬予奉

命視學畿輔復得

旨趨直內廷此異數也請

訓時

上垂念太夫人年逾七十

賜人參豐貂內府緞綢各物

命迎養京師太夫人感喜交集卽買舟北上時

予循行校士夫人迎至水次奉侍入國門歡然團

聚予於永平學署驚聞

世宗憲皇帝龍馭上賓匍匐奔赴京師奉

令上特旨許瞻仰

梓宮卽蒙

召見晨入暮出栖止公署易服隨

上還宮始得歸見太夫人則太夫人慘痛慄

悴已閱月矣夫人目不交睫以待明年三月予案

臨保陽太夫人病發夫人親侍湯藥晝夜不離

牀第牖厠間必躬扶掖太夫人疾革時命夫人

曰吾子行解去京三百餘里聞吾凶信必倉遽奔

歸吾棺蓋而不掩當令吾子見吾去時面目也夫

人痛哭諾及大殮之次日予卽奔歸夫人具述

太夫人言撫棺痛哭氣爲之絕是年秋予挈眷屬

扶 太夫人櫬旋里明年營葬終 太夫人之喪
夫人勞苦備至僅以骨立未嘗告瘁戊午予服滿
還朝蒙

恩仍督學畿輔夫人爲長子汝誠娶婦又遣嫁長
女隨摒擋家務率上下五十餘人來京師途次戒
家人毋得滋事將至直隸訓飭家人等益嚴曰汝
主屢有信屬我矣關防森密必先自眷屬始以故
數任畿輔無絲毫物議夫人內助居多予再任學
政任滿由詹事遷閣學月餘

簡佐秋卿時汝誠汝恭先後登京兆榜戊辰汝誠

成進士館選尋授編修恭逢

皇太后六旬萬壽夫人偕漢大臣命婦跪祝蒙

賜素珠如意緞紬爐盒等物是年以

覃恩誥封一品夫人後十年恭遇

皇太后七旬萬壽汝誠官戶刑二部侍郎子婦史
以

覃恩誥封一品夫人亦隨諸命婦同慶

萬壽賚予便蕃人以爲榮夫人感予父子遭際

盛明致身通顯世膺翟茀時以持滿爲戒予於壬

申夏猝遘反穀疾蒙

恩召見慰諭愛恤有加無已准予回籍調治

賜詩寵行又荷

賜參藥

命汝誠侍歸卽來就職自邁疾至旋里七閱月夫人視予藥物眠食勞瘁特甚月餘夫人卽促汝誠還京奉職諭汝誠曰汝父受

聖恩至深汝趨走

禁近尤當益矢純勤無以我爲念十餘年來予父子每拜

恩旨晉階遷秩殊榮稠疊夫人必北望叩頭早夜

焚香默禱祝

釐寒暑無間也年來諸子中汝誠時以廉俸郵寄奉甘旨汝恭汝隨汝豐等膺一命爲縣令及丞者亦以所節俸入少佐藥餌夫人必問所自諭令慎職守飭簠簋毋貽父母憂諄諄爲囑二十二年二十七年三十年

上奉

聖母南巡夫人跪迎

慈顏拜

賜緞疋汝誠每扈從南來

聖慈體恤必

諭歸省視其母夫人感激歡喜留數日卽令赴
行在執事三十年幼子汝器

恩賜舉人夫人聞之益爲感喜交集嚴訓汝器讀
書勵行以圖報稱時第六子汝弼適遠娶未歸夫
人卽疊寄諭勗其奮志上進以繼承家學其教諸
幼子尤嚴切如此夫人同母弟金鰲肅瞻公暮年
所得子也遺命囑予撫育少嫻武藝成進士以
衛歷官至副將有勇略効力徇部久著勞績由
江總兵調肅州鎮夫人喜謂予曰吾父易簀時

幼弟屬君今得見弟開府可謂不負所託矣然
須教之予素慕成就人之孤遺者夫人輒贊成
年來所拜

恩俸輒量予戚族夫人嘗歎與曰必如此方不負
君賜也性慈愛人以急難告者必審疎戚量力濟
之平生澹泊寡營不露欣戚以長女汝慎三女汝
哲少寡三兒汝懃十七而殤聘馮氏子姁所出也
未娶守貞昨歲物故歲時令節忽忽常不樂又未
嘗不以此少傷懷抱也夫人善自珍攝無疾言無
遽色年垂八十耳不重聽齒不豁今年八月杪偶

感寒熱飲食少減重陽後稍沉重猶日進粥二甌
謂汝誠夫婦曰吾一生惟存善念不敢行一毫刻
薄事所處境地常多順遂自去年汝蒙

恩准歸侍養母子相聚歲餘尤得之望外

聖恩高厚同於天地汝其何以圖報吾卽不諱汝
以予言諭諸弟可也言已復謂予曰今日所服煎
劑吾勿進矣頃之卽逝回憶予與夫人齊眉偕者
垂五十年予叨荷

國恩位至極品夫人疊膺

封典由安人游晉一品夫人子孫繁衍卽先我而

去亦可無憾惟是夫人雖幼未讀書而德性淑善
其處貧賤富貴也實有合於不隕穫不充詘者其
視衆子女雖各母如己出實有合於鴉鳩之義者
因敘其大畧以示子孫垂家乘之末云

香林齋集

卷一

三

跋同年王樓山中丞笠屐圖幀首

同年樓山王中丞蜀人也於里中前哲獨慕玉局
蘓翁而生平宦跡亦相似焉其友人松陵沈沃三
徵士爲摹笠屐圖弄篋中凡所遊涉必載與俱
壬午春夜過予齋頭出以相示時中丞兩子汝嘉
汝璧以諸生在予家塾讀書適在坐予於燈下題
二絕還徵士又數年徵士携圖過予汝璧吏部乞
假來吾郡奉母北上汝嘉解元將歸蜀取婦遂趣
陳生俞仿此并請予題原詩於幀首云

香樹齋文集續編

卷一

三

浙江在籍紳耆士庶

臣錢陳羣等恭謝

恩免七省漕米疏

乾隆三十一年正月初二日內閣奉

上諭所有湖廣江西浙江江蘇安徽河南山東應
輸漕米照康熙年間之例于乾隆三十一年爲始
按年分省通行蠲免一次欽此欽惟我
皇上仁涵翔泳德普甄陶圖治求寧

宵旰厯懷民莫持盈保泰

乾惕敬體

天行胞與維殷醲澤遍禹甸周原而共浹痼瘵時

切子惠合

堯襟舜抱以兼施知小人之依

思惟艱哉曰祁寒曰暑雨爲諸侯之度無非事者
秋省斂春省耕蓋

賜租賜復之多雖隸首難窮其算而議貸議蠲之
數卽載筆莫罄其書雨露之所澍濡物無不被天
地之所煦嫗惠罔弗周於是戴高履厚之倫怡愉
淳化沐日浴月之處溥邇

皇風戶詠康哉酌衢尊而嘒嘒人歌樂只登春臺
以熙熙仰惟

寶籙之誕膺握瑞闡珍早重申夫

帝貺慶肇

昌期於必世籌添算積正錫羨乎

鴻禧福必有基嘉茲累洽重熙之會善惟推本敬

溯

覲

光揚

烈之謨

天佑

聖而昭受用庥

聖法

祖而覃施廣被稽夫漕糧之歲運也賦成七省轉
利萬艘困庾之積於是乎儲積廩之頒由茲而出
間有截留之例從無普豁之條昔

聖祖曾沛殊施父老猶談爲盛事欣我
后重循曠典史冊懋繼夫

前光爰敷

綸綍以遐宣仍

勅度支而廣議就班分歲

恩輝似七曜之循環悉予咸除

大德比一元之通復億萬姓桑麻載蔭化日彌長
數千里潤澤均膏春波更濶此誠今古所希聞實
亦遭逢之罕覲者也是蓋由九瀛清晏萬宇乂安
月竈載瑜乃象來而歛塞天方職貢爰鱗集以仰
流曾無饋饌之少輸但有耕屯之倍穫況夫祥呈
丹甌連莖之穀頻登兆啓黃雲合穎之禾疊獻旣
倉箱之有備聿儲侍之常贏綏以屢豐廣推行而
布愷受茲介福用敷錫以同民惟浙東西漸澤孔
長繫我疆理蒙庥尤渥頻歲

觀風於越海壖鞏固實勞

睿畫之周詳卽今懸象始和台嶺毘連普被

聖慈之康濟

惠有加而無已

施下逮以旁流舞蹈遙申望豫洛青齊而北拱謳

吟相接界衡湘吳會以南連皖國山川均斯慶幸

洪都草木咸此敷華

臣

陳羣等榮領縉紳感叨桑

梓擬華封而晉祝藉傳黎庶之情拜嵩岳以歡呼

爲進野人之頌從茲萬有千歲綿

純嘏以莫不增所願三耕一餘繼大有自今伊始

爲此合詞恭謝

天恩謹奏

恩免七省漕米恭紀

臣陳羣謹案自禹貢則壤成賦以來惟正之供古今通義簡策所載蠲復之舉卽施惠未廣猶亟書之以爲愛民者勸至漢文帝今年之賜尤艷稱焉然祇及田租之半耳洪惟我

聖祖寬仁惇裕久道化成

恩膏時沛筆不勝紀歲入條項漕米皆先後普蠲一次至今天下臣民傳爲盛事我

皇上誕膺寶籙法

祖施仁十年免天下額征正賦一次今三十一年

月正二日

詔免七省應輸漕米一次

恩綸宣示光天之下海隅蒼生莫不歡喜雀躍相謂曰

上天惠愛斯民篤生

聖人繼繼承承俾吾儕得沾厚澤又額手爲

列祖慶曰惟

天純畀我

祖

宗誕貽多福燕翼孫子惠我元元自宋衛齊魯順

流而江而浙達于湘于贛襟帶數千里凡納光轉
漕之域萬姓同聲如出一口臣憶六七歲出就外
傅臣祖時方八十引年家居攜臣隨諸父老叩謝
聖祖鴻恩歡呼蹈舞填塗塞陌越今七十餘年臣
馬齒亦八十餘矣又躬率紳耆暨臣子汝誠瀝詞
陳謝伏思結繩以前書闕有間紀傳所陳斷自唐
虞三千餘年來未有體

天以仁民足民以裕國

世德作求惠我無疆如今日之盛也易曰自上下
下其道大光詩曰以似以續續古之人臣駘背餘

生忝三朝史官受恩至厚自幼至老再遇斯典何榮幸若此耶敬書謝摺并識於尾云

御製唐貫休畫十八羅漢像讚恭跋

臣伏惟阿羅漢旣得四果各具神通曰千萬恒沙
曰萬二千曰五百尊者曰十六尊者曰十八尊者
其名義品彙大小如從乳得酪從酪得酥從酥得
醍醐謂乳卽醍醐非是謂醍醐非乳又失本來面
目

皇上識貫人天學綜儒釋會經傳之瀝液擷象教
之菁華潤法乳於須彌納經海於一滴每於
幾暇讚歎禪宗比於旭日初出萬嶺騰光茲十八
尊者僧貫休所繪旣各詮其現相復詳定其位號

當下指示頭頭是道能使風竹囊琴皆成密諦毒
龍猛虎普蔭慈雲臣竊考名人書畫譜載休善畫
羅漢曲盡其態人問之則云我於夢中所覩如是
耳又太平清話云休畫羅漢至十五尊者尚缺一
相或告之曰師之相乃是也休臨水作圖以足之
遂成十六阿羅漢像今祕府所弄者殆是耶休故
善學人也千餘年後乃蒙

賜讚不知休衲當如何歡喜如何榮幸云臣陳羣
敬識

教授王君傳

君姓王氏諱師隲字文岳號密成先世蜀人由重慶遷漢州丁明末造屢罹兵燹五世祖仕孑然僅存仕生景曾景曾生曰明年十三遇獻賊亂舉家被害曰明掩伏祖墓之傍荆棘中夜則草食江干義兄曰孟者曰明父景曾恩育子也從夾江縣尹任歸省祖墓得之載與俱至夾江曰明生萬福字配庵性明爽意致磊落以遭亂甫定遺孽未靖移居崇慶州尋還則先代田廬久爲他人有因家於城北君生有異稟總角如成人十歲能文父配庵

最鍾愛之年十七補博士弟子研窮經史晝夜不輟父憐而諭止之則閉戶默誦以爲常家貧授徒以供子職脩脯所入鮮腆致養先意承志族黨咸稱之以乙科官長壽教諭居父母喪毀瘠幾至滅性孺慕終身其官長壽也勸導諸生膠庠化之少佻達者遇貧士盡力周卹無幾微德色學宮傾圯捐金新之遷渝城教授興脩學校督課生徒愈殫心力喜成就後學教子極嚴仲子愷登賢書歷任縣事有聲君徃復教誡自安苜蓿任滿當遷奉檄敦趣就駕力辭不赴遂引年歸卒於家壽七十一

家居接鄉里以信順訓子弟以端謹尤篤於收族
痛先世罹獻賊之難播遷無常按譜上塚其可考
者皆次第繕葺以成先志宗人之贅大邑者三世
不返父寢疾舉以屬君越數載君造廬勸歸聚居
城北訪塾師某墓躬親祭掃歲久無廢其居鄉醇
厚類此性耽問學以程朱爲歸愛讀性理諸書不
龐雜二氏之說娶於周爲夾江周處士女習勞勤
勤操作育五子皆成立有文行寓狀乞傳以章顯
其先人者澄也

論曰王氏之盛於蜀者自中和樂職四子講德後

州分里處代有傳述君先世屢遭兵燹尋罹獻賊
之禍不絕如縷君幼承父訓以三物六行飭躬型
士勵俗訓子共相敦勉史稱文黨好教化見蜀地
僻陋欲誘進之不數年人熏其德比於齊魯君職
僅師儒無民牧之責所及未遠沿流溯源殆波瀾
莫二矣

香樹齋文集續鈔卷二

嘉興錢陳羣集齋

重脩嘉興縣學宮碑記

吾郡首邑學宮明嘉靖間改宋興聖寺爲之今大成殿東偏流虹亭其遺蹟也

國朝定鼎教化涵濡百餘年來邑學之規撫釐然大備蓋自釋奠祭菜以至授堂橫舍齋宿庖湍之所位置秩如其他以次建設俱如令甲余少歲遊庠嘗目識之以爲一郡冠冕非輔邑支邑比也積久摧剝漸就頽圯逡巡五十餘年而有事於學者

顧瞻廟貌已非復少時之規撫矣丙戌春邑宰咸寧王君蒞治甫閱歲人吏浹和學故與邑治隣並奮欲葺而新之請於大憲爲捐俸倡伙前司諭朱君今張君暨司訓王君相率勸紳士輸貲屬予手疏贊成邦人士咸踴躍趨事諏日計庸飭材庀徒僦工分力董之杗桷之腐撓者易以堅緻丹漆之漫漶者加之采飾經始是歲孟秋迄戊子冬告竣糜私錢一千八百餘緡不斥公帑不侵民膏而輪奐改觀雖剏構者無以踰之僉曰是役也宜若可以示後者重以屬予予邑人也樂觀厥成不復以

不文辭余惟古昔興學之難論者每歸咎於二氏之角立而無以相勝昔汪太史琬謂時俗尊崇二氏遇浮屠老子之廬施舍不勸獨於聖人之宮攢眉接手彼第見鳴剎注錢信施盆集至語以聖賢之道之宜崇往往扞格而不相入乃今觀於邑學之脩人爭趨之有什伯於釋氏所謂信施者而又出於改寺者之所爲則是鼓舞振興之繇有不期然而然者非幸生聖學昌明之日漸摩涵育於久道化成而曷爲若是其易歟我

皇上治統道統合揆先聖近者重脩太學建立大

成門

親製鴻文昭示海寓吾邑顒顒嚮風愈益濯磨於
學將必有醇儒輩出以黼黻休明無負吾司牧司
教者殷殷相與有成之意予雖耄老猶當拭目俟
之王君名士澣司諭朱名奕曾張名楷司訓名錫
纓其董是役者亦得附書姓氏以勸來者

吳蟻園中丞七十壽序

先生世爲齊之海豐望族祖少叅公由順治甲辰進士官秋曹有聲督學雲南遷山西叅藩初知江西萬載縣滇逆之變屢立戰功擒獲僞謀事聞奉旨褒嘉其他善政所貽邑人祀其威儀於賢牧祠至今偶遇水旱邑人步禱於祠晴雨輒應雍正六年予季弟界與中丞同膺薦舉官刑曹予時官坊局以同譜往來尋予佐秋官中丞翔於郎署每於疑獄及難治大案必倚重焉中丞胸無成見平心靜氣以就於理乾隆十一年出守鞏昌大兵進勦

金川軍需旁午廩恤便繁中丞應之裕如官監司
調劑軍儲糗糧芻茭賴以不匱秉臬滇中民無冤
獄開藩甘肅值西陲底定彫剋未蘇中丞擘畫經
理與民休息元氣旋復

天子知其才可大用三十一年簡佐秋官時次君
壇居郎署壇與予子汝誠同年友也汝誠以少司
馬兼佐秋官與次君共事五六載次君勿承家訓
勤慎敏練由主事歷官正郎京察列一等部臣循
例請迴避有

旨不必迴避未幾特擢巡撫江西兼提督中丞之

蒞江右也開誠布公不設城府於吏治民生未嘗少事操切而綱紀肅然吏局協和民氣寧靜嘗自誦曰不爾吾何以仰報

聖主毗倚重任且吾祖發軔於此吾何以對萬載邑子也今年二月日爲中丞七十揆辰長君垣以舉人由州牧候補正郎次君壇在郎署任內奉差治獄近而畿輔遠而於蜀於秦於楚於閩數歲中行二萬餘里奏勘案件稱平蒙

恩特簡江蘇臬司兩江當塗與次君共事者以中丞父子同受

國恩節鉞屏藩相望江介爲盛事製屏爲祝問序
於予予父子與中丞父子先後共事遭際

聖明志節相許交久而敬與唐之蘇李宋之張呂
有相似者予雖衰老不得以不文辭予維旣醉之
詩昔人謂備五福福必先言壽而壽必由於德德
本於仁而仁則獲壽尙書言種德獨許準陶于門
之高大卜於治獄無冤方今

聖天子以如天之仁洽好生之德中丞世任秋官
復膺封疆重寄所以宣揚德意上契

天心而幾於從欲之治者正未有艾中丞勉乎哉

孫母王太夫人六十壽序

乾隆二十九年春有

旨以乙酉孟陬舉行第四次巡典浙江搢紳先期
集會城之淨慈寺議建經壇爲

聖母祝釐衍慶以展萬姓懽忭感激下悃陳羣以
齒邁忝紳耆領袖乃世居禾郡數往來於武林公
所因得於衆中識孫子觀察用敷暨弟主政新若
舉止閑雅商榷公務才復開敏予甚器之而同里
士夫頗稱用敷舅弟自幼能受母教乃致此也予
心儀之者四五年矣茲十月中澣爲太夫人六十

設帨之辰用敷兄弟仵來出同里諸友徵詩啟請
予一言以介慈壽予受而叙次之曰人子之顯揚
其親者曰婦德曰母教二者其大端也太夫人以
太原右族生而婉孌父贈公某特饒愛之嬪於孫
爲省齋司馬繼室先是省齋公艱於嗣息太夫人
于歸後暨副室胡安人連舉丈夫子姑趙太夫人
已七十餘喜曰吾嚮者以獨子未得孫且多病爲
憂今頓釋矣尋省齋公疾轉劇太夫人主中饋飭
內政奉衰姑必誠必謹滫瀡脂膏手調秩膳抑搔
扶持靡間昕夕又親伺省齋公藥裹子職婦道一

方兼之年纔四十稱未亡人當是時也省齋公遺
子女七俱幼太夫人鳴鳩均平恩勤備至自結襪
繫衣以至延師課讀戒奢敦儉躬衣澣濯而欸接
戚邨周卹匱乏悉合大家女誠太夫人之淑德懿
行雖古所稱鍾郝崔韋無以加焉予思壽之爲言
酬也有是德必食其報回憶三十年前姑老夫病
二雛髮未燥孫氏不絕如綫太夫人以隻身負荷
艱鉅忍泪矢志以安上全下慶延奕世聲流彤管
天之所以酬婦德而彰母教者若操左券也方今
聖天子光昭孝治葭屋茹簷莫不漸被嘗按洪範

言五福箕疇衍之以爲歛時者在是敷錫者亦在是又言有猷有爲有守使羞其行而邦其昌用敷兄弟遭際

昇平益自勵翼以鄉三物敦其俗以承母志他日出身加民以清慎勤三字守其官以華於

國是則鄙人竊仁者贈人以言之義以附張老之末云

叙欽支山遺印

韓子曰凡人作文宜略識字豈必奇字哉陳倉石廩字跡茫昧讀者澀於口吻而不能驟通則相與置之矣蓋自蒼雅說文之學不講而三體流傳識者益尠獨印史辨析毫釐尙存古意故篆刻雖小技亦必有師承不相誣也烏墩欽支山精其業快劍長戟奏刀森然而伯斐之盦季娟之鼎體各粲如國初以來如程穆倩王受之胡濤公江皞臣顧云美徐貞木程受尼輩摹印爲士大夫所珍秘以支山所製叅錯其間當相伯仲耳其兄子義淳古

有家法懼支山沒而不傳刊其遺印問世乞予一言予嘗感宋樓璹工詩善畫浙四明人曾令於潛紹興間進耕織圖四十五幅幅各有詩高宗亟賞之顧志乘遺之向非其猶子宣獻公鑰爲之跋識好古之士孰從而考之予於義所傳其季父遺印有類於宣獻者因并及之

讀墨一隅序

鄉會墨之選所爲示之表以正其趨使天下士子
奉爲圭臬以博取科名語云閉門造車出門合轍
其在斯乎

國家設科取士春秋兩闈萃千萬人於風簷寸晷
中其沈著者嘔心抑慮低滯槁木始一著紙其豪
邁者一唱三歎流連灑落杼柚已成二者致趣不
同而所入選者蹊徑咸備焉凡此皆主司秉公衡
鑒而甄拔之者也藉非操觚家精其識虛其心而
評騰以行於世文之佳者其能不脛而自走耶人

謂選家之權可以引掖帖括諸生予以爲使文風
蒸然日上而不自知者方盡選家能事往時見清
獻陸先生滄柱仇先生碩園俞先生同人儲先生
所品定選本至今人遠風微而譚制義者必舉以
爲鵠方今

天子振興文教體恤士子無微不燭分四書經義
爲兩場俾專力締構以各抒底蘊又於大比之年
集應差臣工

命題廷試而甲乙之操選政者尤當鄭重取材而
登之梨棗公之同好以求合乎先民遺軌此予所

拳拳於特選政之二三君子也眉山蘇氏有言藥
雖進於醫手方多傳於古人選家之事近之予反
其語而益其義云方雖傳於古人藥仍出於醫手
讀者卽其文而證諸先正其有合乎其否乎是在
善學者深思之矣吳子蘭陔學有根柢與予論文
有水乳之契因有是選而序之如左云

募脩文昌橋引

永慶橋北有文昌橋居秦塘之中由郡至鹽官孔道帆檣如織非此不得渡步者負者擔者往者來者男婦老幼率皆由之日夜以千百計其舟楫之自橋下過而東南經積福橋南至新廟爲邑之備路北通壺溪羅漢塘直抵郡城橋之關於行人不可枚舉近因久未脩治日就頽圯橋危石墜水中甚至行人之溺者幾斃遇救得不死者數四今春予上塚過此居人爲予言爲之惻然僧超宗思募衆力脩治以予舊居近此乞予爲引予不得辭夫

一介之士苟存心於利物於人必有所濟聞者必輸且恐後况通道路成橋梁利隄防皆王政所必講工之小者以居人衆力成之費不多而工易集仁人長者諒與予有同志焉

福字說

福有五嚮用歛時惟

聖天子誕膺其全於以敷錫庶民普天同慶受福者益積善以養之所謂自求多福也

壽字說

壽居五福之先猶仁爲四端之首也

聖人有言仁者壽行仁以獲壽長生要道不外是矣

福壽衍於箕疇昔人多有推闡爲說者予生逢聖世年臻耄耄引經揆理得二說焉以似同志共

敦斯義云

割股圖說

女未行而持節於家謂之曰貞親有疾而剔股以進謂之曰孝然則歸熙甫之論與昌黎韓子所譏一據曾子問一援孝經不敢毀傷之義彼皆非歟解之曰聖人立教以中庸爲歸則熙甫貞女論昌黎譏王友貞不當旌是已然事有出於賢者之過與愚者之不可及則君子亦引而許之以敦世礪俗蓋人子不幸遇親疾醫禱罔効思所以已親之疾者無所不至雖肢體有所不計而遑計人之訾議耶同里許母莊孺人幼有至性予嘗耳其割股

愈父頭疽一事閱今四十餘年孺人不以語人令
嗣文學筠菜爲圖以識介其外弟杉屋廣文請題
予樂聞里鄙善事每怪世之論列貞孝獨行輒多
責備因推論之如此

汪季握字說

魚亭第四子名瑜年十五問字於予字之曰季握
而以潤齋爲號瑜本美玉席珍待聘貴能執也溫
潤而澤爲仁仁者壽復取陳希夷先生以貴壽許
省華諸子爲祝瑜其勗諸

香樹齋文集續金

卷二

張母朱太恭人傳

候選郡丞張君芳貽洎兩弟給諫秋芷編脩松坪走使乞傳其王母朱太恭人懿範淑德予嘗往來邗上稔知太恭人教諸孫皆能成學以顯名當世而給諫又予乙丑所得士不復以衰老辭爲撫其行實而叙次之太恭人姓朱氏世籍江都幼端重不苟言笑及長嬪於張爲 贈中憲大夫宗庇公諱世廕淑配張故關內新豐右族太恭人于歸後脩行婦道動合女誠部署家政能以儉勤相其夫簠簋飴滌無幾微闕失生二子長諱四箴字景程

卽郡丞兄弟考也次名四科杜門力學不干世譽
幼後於叔字仙洲者太恭人教子有法課督必嚴
衣帽蒞之不少姑息中憲公沒長子相繼早世太
恭人連遭艱凶悲楚欲絕旣又念所遺孤孫長僅
五齡幼者方髻齟襁褓涕泣而戒其婦江恭人曰
吾與若爲張氏婦忍見此孤露無成耶汝須強起
視諸子無徒洵涕摺膺爲也江恭人深體姑諭侍
姑訓子恩勤鞠育以養以教垂十年江恭人又沒
太恭人親撫童孫以隻手撐門戶閱數歲見芳貽
兄弟才質皆可造就乃諏日召三孫至閣前垂涕

諭曰汝兄弟當分道營業同心勵志齟務爲先世
所遺未可荒怠孫蘭人謹飭可獨任之孫馨孫坦
資稟尙可讀書其壹志攻舉子業倘邀一第他日
仰報國恩庶不負吾一生勤苦撫畜願各勉焉三
孫跪而言曰敬如命太恭人爲延名師課督不數
年馨還關中省試舉第一坦亦同榜高掇明年馨
成進士入翰林又數年坦舉進士館選則馨已蒙
恩由臺諫列黃散矣遠近戚屬聞者莫不欽服太
恭人之教其孫爲可師法至於今馨坦奉大母訓
勤於其職家事一稟家督而兄蘭亦力任世業友

于其弟一室之內怡怡如也太恭人年登九十孫
曾林立疊被珩璜綸翟之錫而躬衣澣濯食無二
截曰吾素性不愛華靡願畱餘澤以貽後人太恭
人天性孝友兄弟皆以質遷入蜀移家不返考妣
墓在揚郡西郊歲時展埽必精必潔灑淚松楸愴
焉永慕欸遇宗婣治具豐腆存拯貧乏德色不形
下逮臧獲厮養俱有恩禮門庭雍睦神明不衰屆
九十悅辰輦下鉅卿長德爲詩歌張之會給諫編
脩先後請急爲大恭人稱觴介壽賓從闐門簪纓
環侍里中爭以爲榮太恭人顧怒不自安猶兢兢

以報

國承家爲孫曾勗踰年邁疾遂卒春秋九十有一
貤封宜人 晉封恭人曾元輩皆以文學世其家
往予貳秋卿直 禁籞給諫兄弟於過從時爲述
太恭人撫育教誨輒誦李令伯陳情表云馨兄弟
三人微祖母無以至今日爲之隕涕今本此而爲
之傳

論曰古之頌賢母者莫不以善教其子爲難教其
子所以及其孫也唐柳玭稱崔山南曾祖王母長
孫夫人年高不粒食而康寧一日疾病長幼咸萃

宣言願新婦有子有孫皆得如新婦孝敬及唐夫
人生子頌孫珙琯琤璵等八人皆至達官昆弟子
孫之盛鄉族罕比柳起之之妻韓氏家法嚴肅爲
搢紳楷範常命粉苦參黃連熊膽爲丸賜諸子每
永夜習學含之以資勤苦其子仲郢三爲大鎮以
禮律身今觀太恭人有長孫夫人之壽而教其孫
則與韓氏之教子同年躋上壽慶昌枝裔宜矣公
父文伯之母謂季康子曰君子能勞後世有繼不
其然乎

式溪汪君傳

君諱燾字宇周號式溪唐越國公裔世爲歙人高祖鑣始僑居維揚以鹺業起家祖資政公允信孝友惇篤五世同爨無間言父奉宸苑卿廷璋恪守資政公家教尤敦內行力疾侍父瘥竟以毀卒余嘗爲之立傳君其次子也君幼穎異知讀書顧見鹺務繁重不欲祖父殫其勞瘁遂棄舉子業偕伯兄熙分任焉奉宸公倚爲左右手戚郇交稱之歲庚辰資政公捐館時父病亦劇君方視醫藥惟謹猝遭大父之變偕伯兄治喪盡禮一切附身附棺

弗之有悔逾月奉宸公繼歿君哀毀備至苦塊之餘卽與伯兄強起經理鹺務蓋浹月間再罹大故倉皇摒擋負荷艱鉅以弗墜先業君固已心力交憊矣君一門食指數百藉君兄弟同執家牒門以內聽命家督門以外君獨摺之內外蘄然俱有條理賓客師友接待過從無異祖父在時也乙酉君母吳太夫人復歿君極誠盡哀一如奉宸公喪閱一載伯兄熙相繼下世君殫力經紀痛伯兄乏嗣卽以長子承均爲伯兄後君天性孝友事祖父克盡色養祖父旣先後見背與伯兄友愛尤篤生平

慷慨好施予樂善不倦如敬宗收族睦婣任卹諸
事皆稟承父志次第舉行至經理鹺務因時制宜
公私交濟同業者得君擘畫往往稱大憲指壬午
乙酉恭逢

翠華南幸君急公趨事屢邀

寵錫愈自謙抑勤於職業君體素羸比年以來出
治世疇入理家政持籌握算皆出一手精力爲之
日耗乾隆三十四年十一月疾作遂不起年僅三
十有六娶洪氏子三長卽承均次承達承執予嘗
感昌黎誌殿中少監馬君墓云年未耄老而哭其

祖子孫三世於人世何如也辱與君世契申以嘉
姻旣爲奉宸作傳未十年又爲君立傳好懿之誠
固有微尙而皤皤黃髮觀居斯世者亦行自慨已

節孝吳孺人傳

乾隆三十二年巡撫浙江副都御史兵部侍郎熊公學鵬疏上節孝姚劉氏等事實請旌下部核議覆上得

旨准行給帑建坊設主節孝祠有司以時致祭而嘉興趙節婦與焉節婦姓吳氏秀水趙倓室父德宏母陳氏年十九歸於趙年餘生子雙鯉時倓父母俱存祖亦在養一堂四世雍雍愉愉節婦鳴雞櫛緹衿纓拂髦晨脩夕膳佐倓奉父母以事乃祖翁與姑方喜其子之獲配嘉耦而戚族里鄰亦咸

稱羨以爲趙氏之得賢婦也甫三載婦方姪次子
賜鯉而倓忽病病且死倓泣謂婦曰我不幸不克
終事我父母以我父母累若若慎無以死謝我慚
若以生竟我事竟事所以謝我也我慰我憾我死
瞑矣語絕倓竟死先是倓病革節婦衣不解帶目
不交睫至是不復寢食呼天搶地每慟輒絕意不
復欲生翁姑急呼曰婦爾亦知爾生之關趙氏者
綦重乎爾夫死爾叔宗孟自血抱繼仲氏吾無子
矣白頭翁媪惟爾是賴是爾婦而子也我翁且八
十旦夕風燭旣失含飴孫亦惟賴爾慰藉是爾婦

而子又子而孫也爾子纔逾晬爾女亦僅三歲是
顧是復以養以教惟爾兼賴是爾又婦而母母而
父也爾一旦哭夫死爾死固得矣顧龍鍾二老生
誰養病誰療死誰收骨而委殮三尺饑誰食寒誰
衣長養誰教誨成立誰完聚是爾生而父無子而
有子祖無孫而有孫子女無父而有父爾死則何
如耶則何如耶噫嘻天水氏不其餒而夫節孝人
倫並重盡節難盡孝尤難婦乎爾盡其難者婦旣
心傷翁語而又念倖垂死時所囑思代竟倖事以
報不忍以一死自完也遂雪涕受命勉進糜粥未

幾翁以哭子死距夫歿未及月越一年太翁亦死
婦倉皇庀治喪事視飯含製絞紵盡哀盡禮戚族
之會哭者又咸稱歎以爲趙氏婦賢且孝也婦以
姑年旣衰且屢以悲傷成病時時咳上氣婦晝夜
扶掖撫摩進參餌調治疾漸平或思時果珍味應
聲輒具以進又恐姑憂傷動疾每清晝拈針宵寒
坐漏從容談說雜引里媪諧笑以曲抒其懷色養
蒸蒸二十年如一日也旣一女及笄教以壺儀動
有禮法爲訪名族擇佳壻適清溪徐氏而雙鯉漸
長從師授讀黎明卽促起齷面總角整捉衣屨具

餐飯進塾夜歸必令背覆一日所受書風簾雪几
寒燈對影機絲維誦聲續續然蓋節婦黽勉訓場
心枯淚血庶幾一日頭角嶄然於以振趙宗而烈
泉下乃無何雙鯉年十七又染病死矣婦拊膺仰
天哭曰我忍死爲趙氏一綫耳奈何賜鯉不育今
又奪我雙鯉耶椎心爵踊慟絕如倖死時姑復流
涕諭曰自爾夫死我病不意至今日繼爾翁死我
病更不意至今日至今日皆爾孝順所致也我依
爾爲命爾朝以死我必夕以亾我年愈邁病愈深
旦晚與爾夫相見矣爾曷少茹痛俟收我以終爾

孝乎婦聞益悲心益痛恐益傷姑心惟時時飲血
孝養益謹又三年姑老病日篤婦徧求良醫治療
罔效顙天願以身代晨夕擁持歷八十餘日無倦
意姑臨終亟稱曰孝哉賢婦孝哉賢婦既殯婦乃
泣告戚儔之在喪次者曰始夫歿時氏欲死而不
死者以白髮在堂黃口在抱受夫之託而遵翁姑
之命也今已矣二老往矣兩子殤矣未亾人生於
世何爲哉乃宗老之長者喟然進曰爾何可死爾
旣受爾夫之託而以婦代子則爾必終厥子之事
爾又遵翁姑命而以母任父則爾必竟兼父之事

今翁姑雖歿奉養之責已終而爾長房也繼嗣未
立如大宗似續何況窀穸未定爾夫猶銜痛九原
是爾代子之職未終也爾何可死婦因自念曰彼
生者之責我如是更不知死者之望我又奚若也
且我事實未竟不得不偷息人間爲趙氏勞人矣
於是廩地師卜兆域亟謀安葬又日夜禱於祠望
諸叔得繼嗣以奉翁及夫之祀顧頻年多故節婦
心力交瘁乾隆戊子月正五日溘然謝去臨歿時
惓惓於牛眠未卜爲憾出篋中貲屬宗孟并割腴
田數十畝供春秋祭饗宗族咸體其志是年冬營

葬畢以從叔秉淵子某爲後節婦其可無憾於地下也已

論曰古者鄉大夫暨閭胥族師亦得書其鄉之孝弟睦婣任恤者以貢於天子此周家久道化成風俗隆盛皆由里黨揚厲之法詳也余蒙

恩予告里居每喜詢里中孝子貞媛秀民善士思一一紀載以彰

聖朝治教休明道化翔洽之盛且以闡幽發潛區明風烈爲里鄙勸節婦與余家稱戚邇其苦節孝行予旣耳之熟矣用備書之以俟采風者

鹽運副使蓼塘席君墓表

洞庭東山席氏世有質行明中書舍人諱本楨起家南雍散貲財以飮齊魯三吳之賑朝紀其績晉階太僕寺少卿太僕生虞部諱啟寓徙常熟虞部生贈副使諱前席師事當湖陸清獻公踐履淳慤稱高足弟子趾美接武前輩如梅村竹垞鈍翁諸名家俱亟稱之並銘其塋石君諱襄字成叔號蓼塘爲副使季子幼明慧七齡失怙哀毀如成人與其兄篤於友悌嚴事寡母必誠必敬旣壯豁達自喜不屑屑儒生章句學侍仲兄官鄖陽究心吏治

慨然有經濟之志讓所居宅於邱嫂挈其配移居
青浦遂著籍焉年近四十循例謁選人得鹽運分
司於浙自筮仕至解組涖官僅五年其所設施不
足以盡君才而所至有循績嘗攝湯溪令峻卻商
戶陋規設匭於四門便民輸課邑遇旱爲除壇墠
步禱雨大沛其秋又苦潦山水異漲漂沒田廬君
撫循流庸力請蠲賑不欲諉其勞於新令協力經
理吏胥不得因緣爲奸大吏倚其材檄委他邑散
賑亦如之補運副釐剔權嚙諸利弊幹練如夙習
陳鹺要十餘條皆鑿鑿可施行者無何被吏議牽

連當去官君亦恬淡無宦情歸里後稍薙葺其居
蒔花壘石旦夕召親知飲酒歌詩徜徉峰泖間致
有遂初之樂云君天性惇睦輕數千金償仲兄之
逋羣從以匱乏告輒分橐無吝色脩先世義莊以
贍族人且多爲惠於其鄉值歲捐數百金以資
行糜重直購藥物以活病者余嘗感李士謙事屢
散家財施予無倦趙郡農民德之撫其子孫曰此
乃李參軍遺惠也君爲太僕曾孫而好施樂善之
風世守弗墜其未竟於官者莫不暨於其鄉且將
貽後以大其施也令子農部紹容每爲余述其先

代懿行甚備且請表君之墓嗚呼惟積善者有餘
慶而託於文字者可以無窮用綴書之以爲世勸
俾後之瞻堂斧者有考焉

文學費雨坪墓誌銘

文學費雨坪名樹榎吳興右族祖金吾起家孝廉
仕至湖北巡撫歷任有治行崇祀鄉賢父豫游員
外郎雨坪幼醇謹寡言笑讀書外無他嗜好人以
急難告者輒傾橐應之無吝色娶汪氏女名亮字
映輝號采芝山人好讀書德性溫淑汪故新安仕
族亮祖父遷浙之桐鄉伯叔兄弟登科第通籍者
行馬相望亮幼孤母孫太君撫育延師課讀究覽
經傳女紅之餘學爲詩無巾幗習氣年及笄歸於
雨坪夫妻相莊戚鄰咸稱爲賢歲餘雨坪補博士

弟子員有聲黌序無何家難繼作構訟數歲祖業
蕩然殆無棲止處亮斥奩具資給之以其餘買數
椽於嘉興郡城之天帶橋夫婦杜門靜寄雨坪數
應科目不售折節讀書如故亮所從師徵士張君
庚庚詩筆高古尤精繪事幼時同予讀書邏水舊
居因得從予母陳太夫人授筆法畫有宋元諸大
家家數亮亦師承焉雨坪夫婦藝蘭種菊門無雜
賓惟汪氏諸彥及徵士至則擘牋分韻所爲詩間
有呈予點定者乾隆戊子春雨坪邁疾謂亮曰吾
門戶式微與若偕棲於此思鍵戶讀書或叨一第

少延祖澤乃年垂五十無所成就後嗣闕如形影
相弔今病勢日沉身後之事悉以累汝亮執手敬
諾少間又屬曰吾得首邱於此實汝之力吾死不
願歸井里汝可卜葬於所居西偏吾死之日猶生
之年亮涕泣曰如命微子命吾計亦如是耳且吾
更何求耶我生爲守冢婦死爲同穴鬼如是而已
移時雨坪遂逝殯殮後亮遣其夫之姪國寶以狀
來告且請予識之乃銘曰

一死一生蓋言友也今乃見之則夫婦也撤其環
瑱戴且負也僑居偕老誓白首也寢疾有言諾而

受也穿是井槲在室牖也馬鼠一坏輟兩手也死
而同穴穀虛右也嗟哉斯人胡無後也我銘以實
可垂久也

處州太守敬亭倉君墓誌銘

歲己丑四月處州太守敬亭倉君卒於任先是太守元配劉恭人歿繼室爲高密宮方伯孫女方伯予故友也遺孤介予及門先期寓狀請銘窆石予不獲辭按狀君諱聖漢字倬甫號敬亭河南中牟人系出黃帝史臣頡邑至今有造字臺址其族累百世無他徙者明光祿寺典簿諱一鯉者君高祖也曾祖諱牧民廩膳生名載邑乘孝義祖諱沃太學生父諱士琅增貢生俱以子聖裔貴贈封通奉大夫兩世好施予多爲德於其鄉大中丞尹公雅

公蔣公先後表其閭列其事於彰善錄母冉氏太史諱覲祖孫女孝廉諱調衡女家世理學慈懿有訓識君幼後於叔父諱士璠叔父天卒事叔母朱恭人晨昏無間能委曲得其歡心越數年朱歿附身附棺弗之有悔伯兄宦滇中父通奉公就祿於滇命君獨任家秉事母課弟俱有條理志在經世不屑屑爲章句儒循例得京曹郎未赴俟伯兄請養踰年始謁選人庚辰秋在京聞河溢牟境兼程策騎歸省遂迎侍邸舍是冬授刑部供職惟謹壬午夏通奉公捐館哀毀備至偕兄弟奉母扶櫬歸

營窀穸。居喪盡禮。服除。仍補西曹。決讞多所平反。
丙戌春。出守處州。抵家。迎養太夫人。以道遠有難。
色涕泣。請不獲命。乃單車之任。明年太夫人家居。
念君甚率。劉恭人來括蒼。未半載。劉恭人得疾歿。
於官廨。太夫人以君遠宦。不可無內助。親詣會城。
謀繼室。婚約既定。卽歸故鄉。君成禮後。常鬱鬱念
太夫人。不置。偶感痰疾。旋接家問。問太夫人計哀
痛。不勝。病轉劇。逾月遂卒。年僅三十有九。君天性
孝友。與弟聖脈分嗣。兩叔父皆早世。惟依太夫人。
孺慕終身。一門之內。雍雍如也。居官待僚友以誠。

字下多慈惠惜未竟其設施娶太學生劉名如濤
女婉孌有文卽太夫人甥也續娶嘉定太守宮名
去吝女以悲痛過毀繼卒子一思謙女四人並劉
出銘曰

我聞造書古三士少者蒼頡爲左史觀法蹄迹文
字始遺蹟猶傳有熊氏四千餘年守其祀太守倬
甫暨曩弟以聖爲名表厥里潢也一麾殞浙水年
命脫從未強仕配劉繼宮孤毀齒反葬於牟若堂
是誰與銘者錢後嗣芘乃雲仍澤永被更千億年

錫繁祉

考城縣綱堂張君墓誌銘

乾隆己丑八月河南考城令張君卒於官配查孺人予女甥也扶櫬歸僑居吾郡旣踰年悲哀痛疾不自勝一日持其夫之弟所爲狀踵予第舍稽顙涕洟請曰未亡人不幸隕所天猶視息人世者嗣子在襁遵夫治命也今就封得吉日星家言獨不利於未亡人審如是未亡人得死所矣微舅氏誰爲銘語訖嗚咽不能起予雅知孺人賢侍夫疾露禱乞減已算以益壽夫歿嚙指出血翦髮納榼中歸涉江河見風起濤湧以身纏榼誓與俱存亡考

城君友愛甚篤其弟狀君行事徵實可信因諾之
則又肅拜以謝案狀君諱允復字海周一字綱堂
又自號寄庵杭之海寧人曾大父士蘅諸生贈奉
直大夫直隸灤州知州大父曾禮以太學生贈承
德郎福建漳州通判父嘉論太學生知江寧縣有
名事具縣志妣查氏封孺人君生四歲父口授唐
詩數首朗然成誦年十四通九經日夜討論有所
論駁援據有本雖老宿莫能難也攻舉子業屢試
不售歲庚午以監生考授縣丞丙子河帥白公慕
其才奏畱河東河工奉

旨錄用凡河隄脩濬防禦君區畫悉中窾要白公
專剡入告會丁母艱歸里儀封張慤敬公耳其名
延入幕府嘗削牘多至百函不加點竄有以暮夜
無知遺金請私事者峻拒之曰奈何賄取我也張
公益倚重焉每進謁戒勿以屬吏見尋補蘭陽丞
遷鄭州倅是年秋黃河泛溢自楊橋南延袤數百
里君督防險要寢食於茅葦者五閱月河流復故
道上游皆交口薦譽名列一等擢考城縣縣故濱
大河地勢窪下每歲潦城濠積水城易圯會有
旨勅脩豫省城垣前令議建新城於蘇家集君莅

任後率土人往復勘視議曰考邑形似覆孟無平原高阜可以更建新城蘇家集北距沙河不及里許伏秋河水漲發難免冲決之虞設城所以衛民民未受其利而水患浸至非所以爲治也按舊城建於前明保障垂二百年毋庸輕議紛更應仍其舊俟冬月水涸城根透露興工脩築以籌永固則事半功倍不致糜帑病民矣議上大中丞葉公燾之列疏於朝得

旨允行其他脩橫舍治杠梁諸有利於民者以次興舉性明敏尤善讞獄通許邪教案起株繫數百

人大憲檄君會鞫置其魁於法餘得釋邑有梁氏
女字於閩將請期矣閩父入蜚語謀別娶梁知泣
訴於庭君廉得其實召兩家子女鼓吹合巹於聽
事諭之曰縣官主婚最吉祥也閩父爲之感悔生
平孝友好調人之急弱冠父沒官解君哀毀備至
喪歸躬營窀穸衝寒手足盡皸裂後客任城聞母
訃徒跣至家號踊幾絕歲時奉祀淚泫泫溢尊俎
間二十年如一日鞠其幼弟光湜以撫以教至於
成學君狀其所爲也縣尉某病歿身後多逋累君
經紀之喪得還友壻陳早卒字其孤無異已出君

既好學勤纂述歷河防劇邑卷不去手詩格老成
尤工詠物書酷摹魯公亦能出新意著有殮和軒
等稿書課書譜三傳異同考禹貢圖說治河偶編
公牘錄存若干卷病草屬孺人曰有嗣子在慎無
效兒女子態以死殉我我癖嗜山子窆我於多山
處植野梅數百本彷彿郁泰元墓清寂也既歿發
其篋僅俸餘數鎰君可謂以文學飾吏治者矣昔
王新城尙書每感文吏如靈壁令馬驢輩皆卓然
有所撰述以自顯於世因歎下僚之中不乏佳士
君殆其人耶君生康熙壬寅十月初八日卒乾隆

己丑八月二十九日年僅四十有八惜乎未竟其
設施也配查孺人贈朝議大夫翰林院編脩雲在
公諱祥女子二女二俱殤嗣子繼勲銘曰

生也有學作脩士有猷有守作循吏死也有妻能

作誄有弟能作誌

用柳下惠妻
及蘇轍事

雖無兒有猶子雖

無金滿籬腹中富經笥遇雖嗇不終躋位雖卑亦
小試年雖促文何斐天之報施不薄爾銘斯藏者
老柱史永安幽宅宜後嗣

香樹齋文集續金

卷二

三

祭馮勗齋別駕文

嗚呼晚近論交相知落落白頭初逢如踐宿約我
臥林泉翁亦邱壑心焉寫兮契以淡泊曾幾何時
忽來夢噩赴哭扶藜如蹈寥廓翁生畿近古范水
城相門之裔上舍之英學富而邃行飭而清醇儒
氣象廉吏聲名用未竟量施必中程河渠奏績一
展其能翁來河渠歷試諸險如塞兒啼隄防泛濫
異漲洪濤衝波周覽爲文以祭默禱神領捷葦稽
束平值以歛翁德入人罔勿懷感石林之役暴漲
是漫勢趨沛邑三版僅全奉檄搶護危而獲安所

活者衆咸頌翁仁河帥嘉悅曰爾來前按所坐席
勝此非難翁心益勤性本坦率守理不違執事以
實其不諒者意見多拂翁固恬然無所於鬱尋奉
恩旨還我故物宰府督河交章薦達翁益振刷以
酬所知每當艱鉅衆望所推翁亦勿却是任是仔
長君捧檄劇邑能治稟翁之訓清慎而慈賢聲雀
起於浙東西翁乃引年就養吾郡山水清娛時領
餘善予一見翁誼敦縉綣懿德所薰同臭斯戀謂
此哲人衰齡是伴天不憖遺潛焉永歎

題臨本海岳天馬賦後

古人論書云通則變歐陽變右軍體柳變歐陽體
皆得法後自作神通也朱子文圻臨海岳天馬賦
神采駛邁要有自家筆行乎其間不必盡刷字本
色殆所謂臨帖須有我者耶

香樹齋文集續金

卷二

詩

與高安徐明經

白尊大人卽世後每念賢昆以幼穉支持家累恐
失學少墜先師之澤積忱數載無時或釋昨冬聞
世兄得與拔貢殊慰遠懷春初僕按試保陽公車
經過承俛諒局鑰未曾相聞隨罹大故倉卒奔歸
昏迷之際亦不知尊駕已來輦下也今者念僕因
守廬次匍匐走視一見世兄眉宇軒發器度冲和
且緒論間以躁進爲可恥以力學爲恆業以親近
正人爲可取法以勤督諸弟爲分內事如此存心
如此勉勵貧不足慮方信玉汝於成周子之論爲

是矣此種見地恐履盈席厚者未易解耳吾師靈爽實式憑焉使僕十年來積憂頓釋至今叔三世兄官麟遊數歲不能遠顧家室實力所未能僕三四年前奉差到陝深知他努力做好官始則見識未能融洽致同城兵弁或未能盡喻後僕畱賓館深談卽以范堯夫持已要嚴待人要寬常以責人之心責已恕已之心恕人二語諄切勸慰令叔頗採愚誠未數月而同城共事者無不心折際此聖明之世廉吏循良當有好消息也
皇上政勤宵旰雖盛暑不暫停引

見日內宜調攝體氣嫻習應對趨走總以從容爲
主而從容必從敬謹得來自然動必中禮也僕檢
閱夏衣有數件可以奉畱世兄替換者又新紗二
疋可製時服薄意四金附用其餘倘有所需用而
僕可以量力應付者洞酌之義何敢忘之

香樹齋文集續金

卷二

三

楊竹坡續刊竹雲題跋序

金石文字流傳最爲奧蹟而考評題識雅不在多
顧非好古而能察書者尠克與焉康熙間翰林金
壇王君竹雲工八法酷嗜前賢遺墨所得金石刻
一一鈎稽真贋手題掌錄必研審再三而後著於
篇往予見竹雲京邸圖史左右其積帙至梁梠者
率古法書也旣同館相善每退直過從見竹雲昕
夕丹鉛辨析窮苗髮不少置則進規曰子欲爲張
仲揚柯丹邱其人耶竹雲笑謝予曰人各有癖樂
此不爲疲也竹雲歿數十年人稍稍知愛其手蹟

并其題跋而哀輯之者不一家家壽泉得而刻之
凡四卷同里楊子竹坡復得其續成十卷校梓以
傳擲顧寧人所謂同此好者繼而錄之者非歟昔
孫莘老守吳興網羅僵仆斷歟於荒陂野草之間
莫不甄錄其墨妙亭石刻大半載王象之碑目而
劉原父在長安其地多古簋敦鏡甌尊彝之屬愛
其欵識文字奇古因以考知三代制度與先儒所
說不同者予嘗惜吾鄉曹倦圃先生聚法書數十
年自大禹峒嶠碑以下凡八百七十餘卷自爲表
示後迄今散佚不傳一字曩曾舉似竹雲竹雲顧

不少懈使其得孫劉覽古之地輯而識之吾知其
所得必有與歐趙諸人相頡頏者而豈僅此一刻
再刻已也

有楊齊文集續金

卷二

三

跋自書蘇文忠表忠觀碑後

眉山此碑爲集中有數文字王半山讀而咨嗟不
已歎爲馬遷秦楚之際諸侯王年表後又得是篇
真足雄視百代碑中所述清獻疏語陳羣嘗考趙
叅政全集未載此文意以非眉山莫辦故委之耶
如張忠定諫用兵書亦倩坡老捉刀古人立言期
於事之可傳文之行遠人已畛域有弗計也此碑
今嵌祠壁

皇上初巡我浙臨幸祠中手摩碑石得句云蘇碑
餘腕力亦敵弩千鈞眉山有知亦應感

聖主千載一時之真賞也

跋唐俊公權使自相吟卷子後

往予爲翰林假歸禾中道出淮壩過俊公先生權
使行廨畱信宿話舊之餘偶涉風雅時令子芝圃
館丈年未弱冠侍其師錫山華丈及一二賓從相
與擘牋分韻卽事唱酬先生詩每先成風格豪邁
如其爲人性曠達不羈喜緩急人於困厄中幕下
士相依者多不忍去課諸子甚嚴芝圃官翰林執
事黃門夙夜勤慎恪守家法先生歸道山後又十
餘年芝圃奉
命權吾浙則予已

予告林栖二十年矣芝圃出先生自相吟卷子讀之多見道語多醒世語詩則從香山樊川入手後漸近石湖誠齋此卷爲華丈所得芝圃請予題識因憶淮海舊遊綴數語歸之

跋自書與劉諸城倡和詩冊後

客有盛稱諸城相公制義功深屢掌文衡所錄多
士文皆可矜式獨詩學未必如香樹原本三唐爲
後進楷則耳予聞而撫掌曰客稱諸城制義好信
然謂詩學不及老夫何所見耶客無以對乃隨手
取拙詩中與諸城倡和之作付讀客頻首曰近年
始得大集僅讀過數卷不謂先生之服膺諸城乃
爾也予與諸城還往詩什不多錄此以見片羽一
斑均足寶愛如此越數日客持此冊來歸曰末學
後生悔未讀秋水篇耳遂綴此數語一笑

香樹齋文集

卷二

五

汪恬齋詩序

丁卯孟冬予從豫章典試假歸還朝時道經維揚馬君嶰谷出邗江雅集示予讀之各體皆備就中澹適安雅則數汪君恬齋有許丁卯秦隱君之風又八年予以養痾旋里薄遊邗上將返棹矣乘夕陽秋霽復訪蜀岡酌第五泉裕衣散步見松下小亭有客據方几啜茗吟詩就之則嶰谷兄弟及汪君恬齋也嶰谷介之登予舟因語恬齋曰予未識君時讀禹廟移梅諸詩早想見其風度矣遂相視如夙晤者嶰谷請予畱一二日邀集中諸子再

舉擘牋之會予以遄歸不果丁丑秋廬雅雨同年
訂遊紅橋問及諸詩人則前輩程君香谿馬君嶰
谷汪君恬齋皆先後遊道山泫然涕下昨恬齋令
嗣長馨錄恬齋古今體詩六卷問序於予予性懶
漫不能爲譽詞見時賢詩文有與古合轍者每低
徊而不能去恬齋爲人以誠樸重其詩以清真勝
其氣味春和無矜張凌厲之習蓋同此花柳同此
風月一入高曠之襟自然融洽恬齋之詩恬齋之
人也松間月上邂逅數語遂成陳跡爲之憮然

節孝張母王太孺人傳

孺人姓王氏父佩國子生母繆氏康熙三十五年適張兆梧爲室旣歸夫貧寡兄弟姑潘孺人方在養孺人躬操作習勞勩雞鳴盥櫛潔進盤匱佐夫治生理夜分不輟姑染病不離床褥者經年兆梧以侍疾過勞亦嬰痼疾孺人遞奉湯藥左右維持寢食俱廢每夜露禱願一身兼代是年五月姑棄養夫病亦篤倉皇庀治喪事弗遺良人憂八月兆梧繼歿孺人呼天搶地絕粒不欲生舅氏老諸生繆本中喻之曰汝夫歿遺孤三長甫九歲次六歲

其幼髮未燥汝今以身殉汝夫此藐諸孤者飢誰
哺寒誰衣長成誰教誨汝奈何以夫故并棄三子
三子棄終無補汝夫之死三子全卽不啻汝夫之
生汝身繫張氏存亡奚事效兒女子爲孺人瞿然
有省拭淚起謝喪畢旣合葬舅姑復爲夫營窀穸
孺人拆衣簪俱盡鞠三子幾無以爲生則取給十
指提刀尺擲機梭以朝夕易食雖隆寒手皸裂弗
惜也又十餘年諸孤以次成婚長泖仲淇季濂泖
尤有才幹所與遊多上大夫而孺人之節稍稍有
聞於時以格於年例不得請 旌乾隆二十八年

孺人年八十諸孤率孫曾輩舉觴集梓里所贈節
孝詩請予序予以巾幘風人顏之越七年庚寅十
二月孺人得疾歿先是泲以縣丞就銓辭不赴孫
楷亦補太學生門內怡怡家亦隆隆日起孺人苦
節之貞亦足少慰矣予於戚郇中節孝懿行尤樂
爲人稱道且悉孺人睦婣任卹訓家儉勤他善事
皆足紀而節孝其大者因從泲請而爲之傳

香樹齋文集續鈔卷三

嘉興錢陳羣集齋

御製幸避暑山莊詩跋

每歲孟秋

上諏吉敬奉

聖母安輿幸熱河行宮駐蹕舉行彌政今年逢閏
七月秋序稍遲而 啟蹕日期與每歲相例去木
蘭行圍將浹月山莊爲

聖祖避暑地山川佳麗風土朴淳草木明秀飛走
馴若塞外周環數千里晴雨應時西成在望時則

蒙古諸藩之瞻戀迎覲者咸衛周廬

上撫景舒懷冲和清適承

歡則六時色養悅

志怡愉視事則萬里情形按晷批答每於

幾暇臨眺圖史爲娛或策馬巡農或命榜近泛蒔
草濬溪種松招鶴皆足以寄天和於遊藝鬯元化
於對時者也又行宮西北獅子園爲

世宗藩邸所築年久傾圯今重加脩葺近始落成
爰奉

慈遊敬瞻

聖藻又臣接閱即抄喜聞

皇上誕毓曾孫祥占麟趾

慈壽行開八旬家慶早綿五世臣仰企

宸居曷勝忭慶茲頒讀

御製新篇五十九首各體並臻神妙詩格愈高詩
情愈遠極自然之氣韻見正始之元音臣陳羣年
衰學淺每朗誦數過覺詩思益增精神頓爽不勝
欽服歡喜之至云

恭和

御製幸避暑山莊詩跋尾

臣父子叨沐

聖恩豢養教誨生成至德高厚難名記臣十六年前偶感沉疴荷蒙

皇上頒賜醫藥粥糜幸得再生至學問一途談非

容易臣仰承

指授耳提面命粗識體裁飲水思源與生俱戴年來頌讀

御製各種詩文口誦心維潛思默玩得窺涯涘晚

年體認似較古稀之前更有進境昨七月間臣稍
感時症遷延月餘節屆重陽臣于敏中寄到此次
山莊

御製詩一單計五十九首賦一篇臣恭讀之下覺
旨趣高遠由繹尋味心志爽快體氣漸平乃靜坐
沉思依韻敬和浹旬甫脫稿亦稍自謂如志則怡
然喜又三復

元韻天趣超邁則又豁然悟自是精神亦漸復矣
遂信紙作書爲冊五凡五千餘字而腕力尙健則

又感六事前蒙

恩有筆老健三字之褒今歲

賜詩有清虛婉約四字之賞實爲終身知遇夢想
所不能得者臣幸遭逢至此聞者且爲之感羨况
身受者耶唐臣張說詩有云情竭爲知音臣之學
問未必卽過於說而臣之際會

明盛受知

聖主實更有遠邁於說者銘心鏤骨筆所難宣依
戀心切寤寐以之自違侍

宸顏以來又經三載當曰爲改歲之時思再造生
全之德感激愈深惟以未得仰報涓埃日深惶悚

茲者敬書拙詩恭進

睿覽並陳犬馬下悃伏祈

慈鑒訓示臣可勝歡喜顙望之至

御製鬪鹿賦恭跋

臣謹疏孔子論三戒一曰色二曰鬪三曰得生人血氣之性其情僞盡於是矣今恭讀

御製鬪鹿賦始言鹿角未就時有牝牡異路之風及其鬪也牝牡相庇則非特角力且有爭牝相護者然是居三戒之二夫鹿一蠢物耳教化所勿能施麋麋祁祁日繁日逐不至於鬪不止人則天地予以本然之性父母予以愛育之恩君師予以董誠之教而機械日深其陰險詭異有什伯於鹿者皇上明物察倫德威互用而不率訓迪猶逞其室

昧愛惡相攻狡詐百出幾於含沙射影恭繹至鹿
鬪可見人鬪難知數語仰見

聖心洞若觀火燭物如神生當光天化日之下猶
不自悔悟以洗滌其身心者亦獨何哉至賦體雅
則言見於序引旨歸於訓誥與孔子論三戒之義
有相發明者在

御製集中尙爲小品而有關世道人心良非淺鮮
者矣又臣侍從日久每奉勅賡和中有放鹿罷漁
諸篇遇物施仁重申疊見益徵好生之德洽於
民心及於庶類尤非贊嘆所能罄云

恭錄

御製生春詩二十首後跋

歲大淵獻月方在涂雉雉應律於嘉平策牛徵早

於旣望

月令注立春在十二月望策牛人近前示其農早

乾來居泰開

鳳紀於三三貞復起元運天根之六六

皇上心含元善福備苞符凝命勅幾秉至誠而在
宥對時育物合庶彙而爲言爰採唐音播爲雅律
不賦春深詠春早乃舍白而依元卽乘春令繪春
生擬吹豳而鼓籥樂

庭闈之豫順和氣呈祥第景物之雍熙太平有象

擷芳鮮而歸典則蒼萃羣書吹化育以遞韶華包
含六幕廿四番花信節應陽初八百顆

驪珠傳來

天上臣陳羣盥誦數四敬錄一通拜颺載賡繕冊
以進

恭

進春帖子詞跋

自宋司馬光歐陽脩蘇軾諸臣先後進殿閣位次
春帖至今副墨流傳猶爲藝林珍玩我

皇上行慶對時承

懽色養每於歲律初啟首製

睿詞以應韶令並許侍從諸臣倣歐蘇故事各裁
帖子進

御臣夙趨

禁近獲與斯典記壬申夏

予告歸里十八年來遇獻歲發春輒以土鼓葦籥

上和

韶讌昨既循例裁帖恭書以

進而葵藿微忱瞻依傾嚮復仿蘇軾副本金書另

呈一冊案軾在元祐間僅五十餘歲

臣今遭際

昌期年登大耋猶覺腕力未衰叨再造之

深恩樂舒長之化日敬跋帖尾竊深喜幸云

御製嚴光論恭跋

光武以白水兆祥赤符應讖自是而降偶拜三公
亦徵之符命議興郊祀皆考諸讖圖延至明章仍
循斯轍臣每讀東漢史乘未嘗不廢書而歎而莫
能究所由來

皇上於子陵傳中客星犯座一語輒悟當時史氏
推測迎合之意傳寫如繪此實

大聖人周知庶物察邇覩遠燭理於既往審機於
至微非儒生讀史捫籥扣槃者所能望見萬一也
至論以足加腹事尤爲發前人所未發帝誠好賢

光誠高尙咄咄子陵狂奴故態寧遽至若是耶

恭和

御製巡幸天津詩跋

臣案虞書九功惟叙九叙惟歌遐想中天之世朝廷行政有關於府事者莫不形於聲詩又曰勸之以九歌合六與三爲九義煩條曠人君庸作於上一時廷臣依永和聲颺言於下以鼓吹休明風示天下光天所燭海隅黎獻共戴尊親古之道也我皇上御極三十餘年翠華所至登岱瞻嵩渡江臨浙

恩膏沾被不可究極畿輔爲首善重地府脩事和

形諸篇什者實與虞廷作歌之盛同條共貫臣藝
謝珪璋質同蒲柳敬效螽測依

韻矢音仰祈

指示臣曷任感激依戀之至

恭跋

御製題耕作蠶織二圖卽用程棨書樓璫詩韻

易原耒耨禮備公桑依古人君首勸敦俗或繪豳
風於展或寫無逸於屏甚至刻木爲耕夫織女置
之禁中顧未有一一圖其事者宋臣淮東安撫樓
璫當南渡之初嘗令於潛念農桑作苦究訪始末
爲圖四十五事事各繫以五言頗稱雅令經進紹
興事詳從子叅政樓鑰後序繼此畫院多有仿爲
之者如慶元之劉松年延祐之楊叔謙雖題署不
同其出藍於璫一也國朝

列聖相承莫不厚本抑末治臻上理

聖祖仁皇帝命作耕織圖各題七言絕句

世宗憲皇帝繼題五言詩我

皇上丕承家法洞悉民依曾依

聖製按圖和詩旣已風行海寓至

鑾輅時巡省方問俗夏畦寒女荷耒提筐畢獻其

忱豫傳休助茲蒙

頒示御題耕作蠶織二圖卽用禱韻共四十五章

臣恭繹之下道合風詩則七月有所未備義該訓

誥則三宗有所未知蓋民間勞苦一經

天藻縷析條分曲曲寫出圖所不能到者詩能傳
之耕夫織女所不能陳者詩能達之又復酌經準
雅體格渾成衣食爲億兆之天
睿篇與升恒俱壽矣

程子集解

卷三

三

恭

進辛卯春帖子詞跋

歲在庚寅長至後六日

臣

陳羣既恭製明年辛卯

春帖子繕摺以進因案立春帖子在趙宋以前

或云春詞或云宜春帖子韻語未爲大備至宋初

始分殿閣位次詞載名家集中壽之貞珉行世者

不可勝數

皇上養志承

懽順時錫福每於歲籥方啟輒揆毫摘藻以集社

迓祥申紀

天庥益彰

慈豫並許 禁近詞臣俱得遵

旨敬擬 臣自引年林栖遇始和令節猶以里諺村
謠藉伸葵藿仰答

英莖今者迎新冒卯忻際

聖誕週甲再編之歲又爲

慈寧八旬大慶之年恩旣被於九垓祚永綿於萬
禩屈指

御極以來布德行慶重熙累洽蒼萃於茲 臣以老
耄餘齡受

恩最渥遭逢

盛際占驗協符形諸吟咏譬之時鳥報春候蟲啟
戶其爲榮幸又視有宋諸賢循例抒詞者不可以
倍徙計矣竊効華封之祝附識冊尾云

香樹齋文集續金

卷二

三

御製小春說恭跋

臣嘗考大易坤卦爲其嫌於无陽也故稱龍焉節
集說載蔡氏淵曰十月爲純坤之月六爻皆陰然
生生之理無頃刻而息聖人爲其純陰或嫌於无
陽也故稱龍以明之易義至精至大然其意旨總
歸於扶陽抑陰古聖人考時正日協律同風於陰
陽進退消長之故必兢兢乎慎之要使四時之內
元氣流通天地之間生機不息故於姤之初六則
繫以金柅而使陽剛貞正之道常吉於剝之上九
則比之碩果而見不食復生之理常存何其警切

而昭著也俗以十月爲小春習焉不察叩盤捫籥傳會因循從未有鑒然能言其所以然者我

皇上察璿璣而齊政秉玉燭以調元凡夫名物器數無義不搜偶以小雅歲陽之義詮釋十月小春之名而

爲之說於先儒愛陽惡陰之理賅括無遺曲暢旁喻皆發前人所未發而於陰陽進退消長之機尤三致意使大易坤剝二爻精義推闡引伸同條共貫所謂其稱名也小其取類也大非

大聖人其孰能極深研幾以至於此若夫語探朱

程之奧詞兼匡鄭之長則又我

皇游藝之餘事

臣

何能更贊一詞云

香樹齋集

卷三

三

御製學詩堂記恭跋

詩固包蘊六義綜括衆言者也而義之所在言以
宜之言之所未能達者惟圖繪足以傳之是故上
自郊廟朝廷下逮於里巷歌謠之什大之興觀羣
怨細而及於昆蟲草木之微作會彰施五色皆有
精意流貫於其中善學詩者考圖觀理卽象見道
使貞淫美刺懲創風勸犁然心目而權衡各當其
宜此詩之所以作而圖之所以可傳也恭惟我

聖皇時敏遜學左圖右書

天藻日新穆如雅頌之奏

宸章雲煥淵乎正始之音本之性情之微樞機之動凡脩身齊家平均天下之道皆有以式型萬方垂訓來葉而

聖學虛受隨時隨地必取鑒於古流覽所及妙契淵衷若馬和之所圖毛詩傳世日久多所譌缺高孝兩朝其於風雅之旨亦多所懷漸所書經文何足以當

宸賞而一經

睿裁釐定刪別薈萃一區又

錫名顏堂

製記以尙論曩昔復慨想於三代淳龐忠厚之遺
俯仰揖讓於其際遂使懲勸之理益彰而美刺之
義大備斯真所謂風人之微旨乎臣鹽誦
大文頰首欽服恍如依永和聲於溫柔敦厚之教
已

御製抑齋記恭跋

皇上秉生安之睿質念典學於緝熙

聖德懋乎淵微治功昭夫巍煥洞徹於天德王道
心法治法之源執簡御煩舉一統萬而以抑名齋
且凡可以供

卷阿懋賞者皆以是榜之座右用識勗勵臣敬繹
鴻篇仰見

聖天子躬行篤踐雖古稱在輿之規位宁之典盤
孟几杖之銘無此箴警臣謹案抑之名義唐虞夏
商以前書缺有間自周公無逸一篇將陳王業之

艱難以明肇造開基之本則以太王王季克自抑
畏一語先之抑之爲言實始於此然而堯欽舜恭
憂之祇台殷之寅畏禹謨之謙受丹書之敬勝垂
諸典誥者語或互殊理無二致則是抑之一言自
二帝三王以迄於今聖聖心源之默契千古道統
之相傳不外乎是大哉

皇言實爲萬世垂訓至

文中引據經義闡發抑字體大思精舉民品之畏
顧諟之嚴載舟馭馬之是欽履泰持盈之交儆胥
於此統貫矣然則抑之時義大矣哉仰惟

聖主臨御三十六年以來兢兢業業如一日茲恭
慶綺甲重開

重延寶籙從此而億萬斯年凜抑抑之思者猶是
人華權輿之始則侯包所稱衛武行年九十餘使
人日誦懿戒於其側者又詹詹何足以云

御製乾清宮五屏風銘恭跋

臣謹案自古帝王繼天立極內聖外王之學代有心傳故六經皆言治之書而執簡馭繁緝熙宥密則易書詩所傳至爲純粹我

聖祖仁皇帝冲齡踐阼臨御六十餘年兢兢業業海寓乂安唐虞從欲之治未有盛於斯也

乾清宮御座屏風正中左右共十有二則揭書經易經詩經粹語懸於

座間惕目警心用垂法守惟

天眷佑我

祖

宗篤生我

皇上生秉聖哲蓋自志學之年侍

憲皇帝在潛邸時鑒

上器宇默契於心乃於承

歡之暇特奏

御名卽蒙

召見愛育有加付託之重實基於此

皇上御極以來敬

天法

祖以

天地之心爲心以

祖宗之志爲志累洽重熙化臻上理於乾隆三十年製紀

恩堂記以遡眷鑒所自今三十六年

上綺甲重開

製乾清宮五屏風銘立言簡要樹義湛深彙羣聖之心傳裕萬年之治統

臣恭讀之下仰見

聖學高深治愈隆而敬益躋業日廣而德愈進以經疏經如文言之作所以發乾坤之精蘊以範翼

範如敷言之訓所以闡河洛之淵微臣尋繹數四
贊歎莫加易曰天行健君子以自強不息誠者之
事也故曰至誠無息

皇上以至誠奉

天

祖卽以至誠御臣民其於行健無息之旨有同符
焉臣陳羣可勝欽服禱切之至

恒上人詩序

吾郡詩僧近代得兩人焉黃葉老人智舷持律精
苦息心數十年一夕了澈隨手爲五七言翛然有
塵外致同時李太僕竹懶董尙書香光諸公視爲
畏友康熙初冬關通復構半齋初地菴勤讀儒書
如治經生其詩風格高老獨宗少陵吳江徐松之
爲較定其集予嘗論次兩人於詩學亦有頓漸之
分恒上人明中少負慧性業儒未成棄去投楞嚴
寺爲僧梵誦之餘兼習書畫嗜爲詩無蔬筍氣蓋
頓漸兼資者主淨慈講席往來楞嚴之法雲山房

適予

予告里居笋輿過訪茗話移時出詩稿相質清軟
絕俗經錢唐堇浦山舟兩翰林芟定予讀而愛之
曾過淨慈遺一聯云山閑不厭僧常住詩好何妨
客屢過

上四次巡浙幸寺中見予所題聯卽問和尚也能
作詩麼上人跽奏云臣僧曾學作詩

上領之因

賜一絕句予平生頗不愛與沙門還往晚交上人
以其意致蕭遠性情真摯上人曾與金觀察齋

同受業於周別駕霽堂霽堂醇脩士也歿二十年
未葬上人哀衣孟之羨手封其冢觀察欽成之屬
予作詩以識乾隆丁亥春上人示疾前數日屬其
弟子佛裔曰山舟居士曾許刊予詩予詩不足傳
得香樹太傅序之庶與文暢秘演輩挂名禪藻幸
矣予不能文重其遊方之外而行敦在三也應之
顧衰懶歲餘未成佛裔申前請乃詮次之如此

香樹齋集續金

卷一

三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

贈太子太師大宗伯沈文愨公神道碑

國家當隆盛之時必有敦龐艾福之臣或以經術見優或以文章取重布在廊廟則朝多皤皤之良華首之老及得謝而歸則掌其鄉之教法以興其德行道藝史稱推其有餘足芘當世者代有其人顧未有一生勤學敦行不苟求聞於時晚受

聖主特達之知壽近百歲名動四裔身膺顯秩沒備飾終天下宿學英彥莫不人人奮勵歆羨如文愨沈公之遇之奇也公諱德潛字礪士自號歸愚其先吳興人明初處士壽四公始遷於吳貫長洲

十傳至公曾祖諱世烈鄉飲介賓祖諱欽圻邑學生有詩名考諱鍾彥課子有方公既貴跼

上前涕泣陳情

上憫之特贈其三世如公官公生五六歲通曉四聲逾冠補諸生歷歲科試凡三十餘次鄉試十有七次間經學使者洎主司批閱可其文則欣然有榮色數被薦不售亦無悴容弟子經講畫者多成名以去公顧益刻苦自勵形於詩歌無幾微怨尤語其安命類如此

上御極之元年徵試詞科公又不遇越四年己未

始成進士入翰林則公已將七十矣乾隆七年授
職編脩

上見公年老詢知爲江南老名士
勅和消夏
詩十章稱
旨白是

聖製出輒命公賡和多所激賞不數年由春坊累
遷詹事內閣學士兼禮部侍郎直

上書房侍諸
皇子讀書典甲子湖北鄉試充
戊辰會試總裁俱稱得士予子汝誠亦出公門下
公素有噎疾察典自陳

上命解部務食原品俸仍在

上書房行走尋念其衰老許歸享林泉之樂初公
爲閣學時給假省墓

上賜詩褒其孝思預譙涵元殿

上手賜大學士以下十一人酒公與焉至是復賜
詩寵行 詔朝臣祖餞稽古之榮古今罕覩公

歸

上眷注益優有司以時存問縑帛參餌之賜無虛
歲暇日作天都雁宕遊各窮其勝前中丞王公師
撫吳延主紫陽書院講席造就後學多知名士予
曩佐秋官倅直禁籞會公亦供奉 內廷見公承

旨矢音力追正始

上嘗召公與論詩學源流諭曰張鵬翀敏捷過汝
汝風格故自勝之一時同直者咸心服

上鑒裁之精旣與予先後懸車鯨水鴛湖過從伊
邇二十年中遇 國

大慶赴闕祝

釐同拜

賜杖入香山高會圖形

禁中頻歲

時巡江甸扶杖扈遊同拜

渥恩卽家晉秩昇

以里精宮銜兩家幼子童孫亦成年輩

上曾賜詩榮稱二老每降勅體恤必聯名綴屬領

袖東南縉紳客歲奉

詔以高年戒勿北上呼

嵩更迭勸止尤爲昇平嘉話公年長予十三故予
所兄事者也辱公序予詩文集稱許溢分竊欲及
身倣司馬光范鎮互爲銘傳而公已不及待矣公
薨之明年孤子種松以狀來請予碑其神道予惟
上之知公特深至叙其所著書爲涑水後所僅見
公經進諸作原本忠孝而於求莫達情三致意焉
上用是益重公

天語褒嘉一則曰學有本原一則曰道存風雅世
徒艷公以詩受知顧

上所以裁成之者亦復無所不至嗚呼公之生平
非困窮積久則無以厚其植非遭際

文思天子則無以發其蘊後有作者可以識所嚮
往矣予故畧其行事諸見彭大司馬志中者不復
贅而大書公之窮不隕獲達不充詘足副我

皇上眷遇之隆俾揭於阡而系之詩曰

帝紘延攬天閭四闢陋彼漢廷蒲輪束帛有斐沈
公神仙標格七十登朝紆青垂白乞言者年陳詩
其職會先九老歌和八伯

帝曰德潛予愛汝德麟趾振振咨汝輔翼
詔

許歸田青門餞席黃山赤城扶藜登陟公教於吳
士脩允廸繼志繼聲咸稟繩尺友善所資多聞亮
直望以學崇慶惟善積惟

帝眷公騷壇者碩造化爲爐鑄顏作則用勸來許
過者必式

祭沈固廬親家文

嗚呼衰齡朋舊落落晨星增旣不得失更何任念
我沈兄猝傷我膺兄生荅川我家長水族埒門才
居距百里幼而象勺以兄以弟年未弱冠貢於京
師摩挲石鼓考評相資同充教習官學下帷兄考
吾師詞林重望多士傾心百川手障羣所爲詩稍
端趨嚮公選國秀羣作與焉命兄密訂芸案丹鉛
同郡與者朱李彭錢兄來語予意予私喜予則瞿
然汗下而泚自是爲學差識跬跬選人上注同登
賢書再試不利各無寧居我寓瀛鄭兄歸井閭三

歲不覲各抱子女陰陽不差申以縞紵媒妁將命
實惟舊侶兄故碩學經濟亦優借才佐幕歷東諸
侯暫分宦料庇家是謀驥子拔萃謁予京輦猥就
論文願畱執卷洎登上第先已注選牽絲山右迎
養花封予子侍側父執婦翁子登剡牘聿放南宮
子名書屏雄州劇郡聳宰南疆去浙爲近唯我與
兄過從稱健兄袖子俸我出 賜金從以孫子而
雅而南 叶 酒闌吟倦接枕連衾歲在敦牂兄方笑
偶覃懷訃至慰翁善保 叶 兄示我書同忠何厚
帝簡良守金城是治兄頷兒請熊軾而西扁舟告

別執手涕洟

帝曰汝昌叅藩關內子舍新開昔游所在敲石居
諸欲養其逮花飛春暮言歸緇輶扶杖走哭詞寫
注瓶兄今來格我言試聽

香樹齋文集續金

卷三

三

與劉繩菴相公

昨接高制軍信得閣下手械賤番無多而情文斐
疊勤拳有令侍惶悚不敢當者因思大君子雅好
緇衣每見一行可稱單詞足錄卽素未相識者猶
中心藏之不啻若自其口出侍與相公同館同直
十餘年志趣合業術同於同直中尤深契焉自邁
沉痾蒙

聖恩再造回生得生還井里十七年中受

大家雨露衰草枯木猶得向榮平日讀書惟主存
天理近人情存無欲害人之心行可以告天之事

每有撰述著紙後多不自收拾所受病者有二一
曰貧一曰懶貧則不能延抄謄之友懶則隨時失
去家居後於篋中架上破甕舊囊所存者付一二
親知清理共得詩文六十餘卷其遺佚而不可追
尋如樂府一卷襍錄一卷大旨歸於脩己治人濟
物差有一得者今其半亦散見拙集中餘者置之
嘗自笑曰安知他生不學房次律遇故物耶卽如
爲閣下題小照一二首直次車中行館俱不可得
拙脩稽尙書嘗以侍散懶切進規語今亦未嘗不
自悔也閣下期許逾分固不敢當惟益勵餘生垂

訓子孫以忠厚謹慎庶幾萬石之風因見閣下家
世清慎嗣音濟美實堪師法用敢自狃寸衷藉報
瓊琚耳

香樹齋文集

卷三

三

與崔制軍

去秋麾幢臨浙極荷盛德念舊情深感銘何可言
喻入春以來聞閣下辦理臺境生番逞兇之案妥
協周詳此時賊渠正法逸犯盡獲臺郡肅清額賀
額賀啟者 先祠表忠觀歲久傾圯地方當道正
議興脩緣公事殷繁稍稽時日復蒙閣下於辦公
之暇念及 先人有保障浙土之功諄切面諭屬
吏迅速興工今於清和下澣告竣第聞之忻喜感
激乃放棹來省瞻仰 先祠耳目一新水源木本
豈敢一日忘之隨詣各當事叩謝外惟是閩浙路

隔二千不能踵叩鈴閣敬脩蕪啟鳴謝行將問明
工作顛末及所費銀兩數目敬製重脩碑記一通
泐石祠側以垂久遠因王分司燧實司其事此啟
卽屬其轉寄不一

與王白齋司農

新孝廉蔣生乃僕同年友

恭棐

廸夫先生之孫廸

夫自幼好學遊京師與張文敏天瓶尙書齊名而散作經學文敏歎爲不及守翰林二十年以終僕每云績學之後必有繼者十餘年前偶遊吳訪其家見生於家塾中頭角崢嶸召之語甚明晰取家課時文觀之亦頗有思致適望山中堂榕門中堂兩公先後訪余旅次爲言其事並請兩公念同館之誼送入書院則歸愚太傅亦甚喜如是數年忽遇孫陽暗中摸索得之予不覺狂喜昨生買舟來

叩僕讀其文見其受知賢者思文章之針芥天道之循環因切實爲之指示諭以務實從忠識見周到守身謹慎每日尋自己過失作詩文力追雅正通仕籍不可狂妄又諭之曰老夫一生只守二語而時時恐恐然者存無欲害人之心行可以告天之事十四字至於居官居家又有十字箴曰我寧甘餓死周之亦可受至於今每跬步不敢忘也生行矣其努力上進承祖澤報

國恩使知我成我之明師鉅卿皆相慰曰當日所賞識之秀才眼力尙不走作僕與兩相公及座主

一爲解頤幸甚數行奉寄且以驗兩相公之畱心
造士并歸愚太傅成就譽髦爲佳話也

香樹齋集續編

卷三

三四

與馮柯堂中丞

前月使歸捧到瑤華極承垂注兼惠佳釀延齡扶
老飲之收益良深還望知己繼此也諸甥俱能恪
遵庭訓不與戶外事偶至敝齋情話第必披示作
文大旨閒及應世持身當先立於不垢之地竟不
必存若將浼焉之跡羣自幼讀書初無把握成進
士後閱歷垂五十年始悟古人云不夷不惠君子
居身之所珍也因見老妹丈涵養功深年來益爲
欽服偶於綺季四甥趨侍之便信筆及之宣城紙
佳者可分擘三層理堅質潤乞覓便寄來佳墨副

之東坡藏此至富詩有殘債應消三十年句第則
年已耄矣或不至卽填溝壑當藉紙墨遣餘年耳
因風代面不盡依依

與嵇河帥

閣下駐節濟水以來豫工安穩黃運兩河俱極通
順知重臣經理 國恩家慶濟美交輝弟忝契好
曷勝禱祝惟是弟衰頽日甚每端居懷友靜言思
之如吾兩人道誼交分二十年中會合無多象山
寺畔詩仙宅裏毛直指舟中僅以詩紀會者三四
首耳最暢者第字五古三首皆鑄貞珉前歲坐索
題詩表揚祖澤此後更不知何時尙能把袂叙情
分賤琢句否也數日前繩菴相公手劄詞旨勤拳
且言拙集中未曾有劉錢之作可見會合之難當

日同直 內廷劉錢至爲同志間有吟咏第疎懶
遺失誠如閣下曾規第云使香樹半生隨手題識
贊跋不自輕棄貯之錦囊則香樹齋詩文卷帙尙
可倍今日也此雖閣下賞許過甚第固不敢當然
亦切中懶散之病前歲握別後又有奉

勅恭和詩三四次將二百首鈞天高遠神妙豈巴
人下里所能仰窺一二然衰朽鈍姿得不至荒殖
者皆

聖主啟廸深恩閣下愛我有素用敢述及耳鄙人
近狀五兒口稟臨啟瞻溯

與閔方伯

年兄屢膺 特擢良由居心公正勵行清勤以精
白治身以和平任事猶憶六七年前祝

釐入 覲逮辭 闕言旋道經岱麓承篤念老夫
車殆馬煩減從枉晤剪燭夜談時見閣下事事鞭
策向裏不求名譽輿論自孚

聖心自契近有人來言辦理軍需惟楚藩清身苦
體甚至匹馬周巡所過部下不知有方伯麾幢此
與劉寵行部所過州邑吏人指廚傳曰尊官可另
覓逆旅舍此灑掃者常待劉公也寵遂過去古今

人有契合者耶近知卜宅吾郡諸郎君曾來一晤
挹其舉止闇然自脩試之經學亦頗明晰角里有
兩佳公子一爲中丞家一爲方伯家里人有稱其
家兒之譽僕兒子汝誠適望衡連宇僕數數過子
舍知之最詳敢以奉復至僕衰老林栖荷蒙
聖主眷念舊臣恩禮有加無已清夜自思感悚交
惕知我其何以教我也

汪椒谷詩序

余於邗上諸詩家曾序汪君恬齋詩恬齋澹雅才也與馬嶰谷兄弟結邗江雅集人方之顧氏玉山徐氏金蘭云恬齋旣歸道山令子椒谷主政復以詩鵲起家有園以九峯得名

聖主南巡江甸數幸其地

天藻畱題椒谷爲樓藏弄惟謹於是四方遊士之以詩鳴者相與訂攬環結珮之好其詩名遂亞於恬齋嘗考古來父子稱詩代有其人而詩則不必盡同要各有其卓然可傳者正不妨別樹一幟於

壇坫間也椒谷少承庭訓習聞溫柔敦厚之旨發
爲詩無急微粗厲之音其於報國思親憶弟懷友
之作三致意焉庚寅冬余舟泊邗江畱數日椒谷
導予過其園出前後紀

恩諸詩示予述

眷遇備至旣又出詩草乞序且曰馨詩不足當大
匠評隲乞訓示數語可乎予讀不終卷歎曰詩境
澹雅何其甚似而翕恬齋也予聞古之克世其業
者謂之疇人志律歷者往往以爲難椒谷家業澹
能保以滋大而不廢詩詩格亦謹守其門伋今而

後謂椒谷秉詩教爲箕裘其非譽詞也已予歸里
經時歸其詩因弁其卷端

香樹齋文集續金

卷三

三

氏有之遇其人矣而不甚傳於世又七百餘年爲汪氏所有得其所矣而未必稱於人自

翠罕來游寵以宸翰於是名流騷客之集於此者莫不低徊吟賞不能去昔元章得南唐研山石徑長纔餘尺而峯有華蓋月巖翠巒方壇玉筍上洞下洞龍池諸勝與蘇仲恭學士以易甘露寺下古宅題曰北園旣而悔之筆想成圖復題曰吾齋秀氣當不復泯矣後研山流轉數姓吾鄉朱文恪公得之至竹垞前輩出乞名賢題識今九峯之大有什伯於研山者而昔壘北園祇供顛拜今植南園

得邀

宸賞豈非奇石之奇遇哉椒谷出圖及紀

恩詩請予記因書以泐諸壁

遵

旨覆奏劄子

奏爲遵奉

諭旨敬泐寸悃據實覆奏事竊臣世居浙西幼習
舉業間作詩歌時臣父母家訓甚嚴凡有才無行
之人不許往還悖理傷化之書不令寓目臣祇遵
恪守閱今七十餘年矣每見前人詩文刊布流傳
稍涉悖謬者切齒痛恨至林栖十八年來受

皇上優恤深仁舉家頂戴挾髓淪肌捐糜莫報前
月頒到

上諭查繳錢謙益初學有學集等因仰見

皇上發奸摘伏實爲千古立名教之大防伏思此等詩文狂悖已極自宜亟爲銷燬不令片紙隻字流布於光天化日之中至臣家本寒素所藏書籍本少又臣自幼學爲詩文於大節有虧者屏棄不閱平時訓子若孫暨及門弟子鄉里後進無不切實告誡至再至三不令少染惡習若錢謙益者實屬不齒人類每於他處見其題詠一二必鄙夷不觀實臣稟性如此並非因錢謙益悖逆敗露始持此論也茲九月十四日撫臣永德查驗嘉善等縣

城工取道嘉興親至臣家宣揚

聖諭愷切指示凡有血氣咸當凜遵恭讀至

上諭錢陳羣於錢謙益詩文似非其性之所近且久直內廷尙爲經事諒不致以應禁之書轉視爲可貴欽此臣當卽伏地叩頭感泣嗚咽至不能語前次撫臣承德諭令嘉興府知府李允升到臣家查問有無臣卽據實告知實無初學有學等集隨將家中所有書本仔細檢查緝至廢書堆中止有錢謙益尺牘三本當卽面交撫臣所委查收之員東陽縣縣丞安汎彙繳至臣舉家父子祖孫叨沐

聖恩至深極渥焉敢存畱悖逆之書夫讀書所以
明理大義既乖必遭天譴臣雖至愚必不敢自取
罪戾并貽禍子孫也所有微臣披瀝下悃理合遵
旨據實覆奏謹奏

諭豫章孫

汝今年力疾應試我甚挂念然亦早知汝身子無妨及試畢回來見汝三藝俱清晰妥帖不落浮泛淺膩諸習氣乃額少被遺在人以爲被屈此種境地人以爲難受而在根氣深厚者不過於榜後旬日內昏昏鬱鬱者數日卽猛省自訟曰此正天之所以成就我也於是通計應讀之書未讀者某某種已讀而未深領其趣者某某種至於古文詩賦奧義紛蹟豈少年登科者所能探索然亦有弱冠登高第而成大儒此其得於天者獨厚卽古人中

亦不數數見也前日作信諭汝祇就我香樹初集中爲翰林時答應科目諸生詩四首咀嚼數遍氣自平心自清煩悶自解我若幼年自十五至三十五六於被放後也學後生輩無聊之態時見於兩則我之窮途境地十倍於汝其尙有今日哉孰知望四十而通籍居然年登耄耋爲

三朝國老中第一人願汝等恪遵斯致爲綿遠步武計也端孫今年文亦可入彀六兒文比上屆亦有進境此諭汝可抄兩紙各付之并抄一紙還我存稿庚寅九月十五日付孫豫章

敬書

御製東巡詩冊子後跋

歲辛卯二月

上延 禧泰岱釋奠孔林慶禮告成仁周恩洽是役也自啟蹕以至廻鑾陸路水程皆欽奉

慈輦安輶怡愉恬適前後得詩如千首蒙

恩頒示 臣恭讀敬和者計百三十首明禋展謁典至隆也錫復蠲租恩至渥也至

鑾輅所臨勤求民隱訓飭官方籌度水利河防以及輿圖名勝聖蹟賢祠莫不形諸詠歌詳加釐訂

臣
監誦再四仰見

聖敬日躋學與年進卽事命題有得之歟獲者有
賡疊前篇者詞旨深長義無重複凡

天藻所敷山川助色卉木增輝臣衰老林栖何幸

得瞻

睿製儼如二十年前

珥筆屬車傳鈔維誦也敬繕三冊以進可勝榮幸
云

恭和

御製東巡詩後跋

昨三月下澣齋摺家人歸自山左接到此次

行在頒示

御製各體詩計百三十首

臣祇領聽誦無體不備

無嫩不臻握官敬和擬仿陸游日課一詩之例而
衰齡淺植思致艱澀竭才殫智凡三閱月而成脫
稿後每改罷長吟益覺

元韻如英莖韶濩非

臣

瓦缶之音所能賡颺萬一

敬繕三冊外

恩賜七律一首敬謹恭和另繕卷子一併恭呈

御覽伏祈

訓示

跋白書

恩賜御臨米帖恭記詩後

陳羣白

予告旋里二十年來拜

賜御筆書畫墨寶甚夥近因祝

釐北上檢點篋笥大兒汝誠六兒汝弼七兒汝器
隨侍同行二兒汝恭候補京師部選蜀之洪縣蒙
恩以陳羣年无調任衛地便道歸省畱信宿卽赴
新任因出

御畫橋梓圖付汝誠敬藏曰此恩賞命意因橋

及梓汝宜勉之卽守之世世可也又檢

御臨米帖一燈付汝恭敬藏曰汝有志學書清理
案牘之暇敬瞻筆法又讀予恭謝詩內有波磔自
赴渾節角姿態益發華不腴南宮習氣盡擺脫得
其神髓遺其膚數語可悟學書之法

至人天縱自非思議可到而握管仰窺亦庶有得
又論諸子及諸孫云我受

恩深重現在司中什襲者不少我畱以敬觀且藉
以怡神益智他日汝輩得之人懷盈尺和氏不足
多也况郭外八耕之五十畝耶汝恭跪而受之請

予并書恭謝詩於冊爲跋其尾

香樹齋文集續金
卷三

卷三

三ノ四







